

# Jokotolè

MERTÈ BHĀSA NGAJHUM BHĀNGSA

MAJALLAH ABHĀSA MADHURĀ  
ISSN 19796129

29


Juli—Desember  
2023

BALAI BAHASA  
PROVINSI JAWA TIMUR



## Mertè Bhâsa

- Ngaonéngé Parobha'anna Sowara Sé Épangghi'i  
É Dalem Bhasa Sé Saparmilian Sareng Bhasa Madhura  
(Prof. Dr. H. A. Syukur Ghazali, M.Pd.)



2

## Pokeddhân

- Kamèmperanna 'Tanèyan Lanjhâng' Madhûra  
kalabân 'Rumah Gadang' Minangkabau  
(Mien Ahmad Rifai) ..... 6
- "Andhâp Asor Lalampana Sopan Santun  
è Madhûra"  
(Hidrochin Sabarudin) ..... 9

## Dhungngèng

- Buta Sareng Bungko'  
(Angghidhân Jufriadi)



## Carpan

- Kembângnga Lorong  
(Mudhar CH) ..... 16
- GHABANGAN  
(Angghidhan Jufriadi) ..... 19


## Puisi

- Harwiyanto ..... 23
- Tarmidzi Ansory ..... 24
- Jufriadi ..... 25



## Lalampa'an

Balai Bahasa Provinsi Jawa Timur Nyombhang 210 Macem Dhabuwan  
Bhasa Madhura Kaangghuy Mangolbu' Ajhina Bhasa Indonèsia  
Sè Sajan Amanca Barna Sareng Parjhugha  
(Puspa Ruriana Balai Bahasa Jawa Timur))



## Saè Èber

- Kuwè Tatabhun ..... 38
- Kuwè Lempok  
(Lilik Hasanah) ..... 40

- Cerbung** ➤ Luhad (Zainudin) ..... 41

## Jâr-Kalènjâr

- Pasèsèr Lombâng Sè Apaghâr Camara Odâng  
(Harkoni Madura)



10

## Salèra

- Adrian Pawitra Tang Kancah  
Sè Palèng Kènthel  
(Supik Tresna Art)


26

## Kandhâ

- A' Bustomi:  
Sè Abhillâi Bhâsa Madhûra Marabhut  
Ghulâbbhâ Apoy Sè Pagghun Rebbhâng  
(Puspa Ruriana)



34



## Resensi

- Odi' Bân Ta-carétana,  
Satèngkes Sanja'  
(dina F Muja) ..... 47

28

# Jokotolè

MERTÈ BHĀSA NGAJHUM BHĀNGSA

Majallah Abhāsa Madhurâ

Penanggung Jawab  
Umi Kulsum

Pemimpin Redaksi  
Puspa Ruriana

Penyunting Bahasa  
A. Syukur Ghazali  
Abdul Ghani  
Suhartatik  
Iqbal Nurul Azhar

Desain Grafis  
Oky Narna Putra

Sekretariat  
Budi Aries Santosa

## Alamat Redaksi

Balai Bahasa Provinsi Jawa Timur  
Jalan Gebang Putih No.10,  
Kel. Keputih, Kec. Sukolilo, Surabaya  
Pos-el: [jokotole.bbjatim@gmail.com](mailto:jokotole.bbjatim@gmail.com)  
Telepon (031) 5925972

**Cateddhân:** Tim Rèdaksi nyo'on sombhângan naskah dâ' sadhâjâ para maos, saè aropa carpan, pokeddhan, puisi, lalampa'an, salèra, lakon, jâr-kalènjâr, kanđhâ tor salaèn èpon sè bâdâ kaèdhânnna sareng Madhurâ. Naskah aghunaaghi èjhâ'ân bhâsa Madhurâ taon 2011 terbi'anna Balai Bahasa Provinsi Jawa Timur tor èpakèrèm langsung dâ' ka alamat pos-el: [jokotole.bbjatim@gmail.com](mailto:jokotole.bbjatim@gmail.com). Sadhâjâ naskah sè ampon maso' ka rèdaksi tantona dhâddhi hak milik rèdaksi. Saterrosèpon rèdaksi ghâduwân hak ka'angghuy mateppa' tolèsan kalabân ta' ngobâ èssè aslina. Rèdaksi jhughân ta' nangghung dâ' kaasliyanna naskah sè ampon maso' ka rèdaksi.

## Pèyatoran

Alhamdulillah, pojhi sokkor ka ajunannèpon Allah Sè Amorbhâ Jhâghât sè ampon aparèng rahmat sareng kasempadhan mèlaèpon ka'dinto rèdaksi èparèng kabhânjhurân tor kabhâjjhrâ'ân kengèng nerbi'aghi Majallah Jokotolè èdisi 29 panèka. Rèdaksi ngatorraghi sakalangkong dâ' kaèhlasân para maos, para pangangghit tor panolès sè ampon areng-sareng majhurbhu Majallah Jokotolè.

Majallah Jokotolè sakalèyan agghi' hadir kalabân ka'adhrenggan sè anyar bân pasthèlengngan sè lebbi palasdha èdâlem malampa'aghi sambhudhân sè kengèng mamajuwâghi literasi sè akaè' sareng bhâsa tor sastra Madhurâ. Majallah Jokotolè èdisi 29 panèka hadir è dâlem format sè lebbi jhângkep. Bâdâ ðuwâ' macem angghidhân (Mertè bhâsâ sareng dhungngèng) sè ta' maso' dâlem rubbrikèpon Majallah Jokotolè èdisi sè tapongkor, samangkèn èhadirraghi dâ' para maos kalabân tojjuwâan bhâdhi maghenna' informasi, wawasan sareng hiburan dâ' para maos. Mènangka pakakas informasi, rèdaksi Majallah Jokotolè ghâduwân kawâjibhân sè rajâ bhâdhi mèyara tor ngalastareyaghi lalampa'an bhâsa tor sastra Madhurâ nyopprè pagghun tegghu è tengnga ombâ' modèrniasi sareng globalisasi.

Salaèn ðâri ka'dinto, tim rèdaksi ghâduwân tojjuwâan bhâdhi aparèng pangaonèngan akaè' Madhurâ dâ' para maghârsarè kong-langkong maghârsarè Madhurâ. Rèdaksi ghâduwân pangaterro bhâdhi adhâddhiyâghi majallah ka'dinto mènangka media sè kengèng dhâddhi sarana panèngghiyân kajunjungan bhâdhi pamaos dâ' bhâsa Madhurâ tor sarana parbujudhân sambhudhân palangghengngan bhâsa Madhurâ.

Sadhâjâ èssèna Jokotolè aghumantong kaèhlasân tor kaparduliyânnèpon sadhâjâ para maos sareng para ghumatè pangangghit tor panolès. Mèlaèpon ka'dinto, rèdaksi ngarep dâ' bhântowan sadhâja maghârsarè Madhurâ husussèpon para pamaos ka'angghuy ta' pegghâ' nyombhâng serradhân, agghidhân carèta, otabâ tolèsân-tolèsân sè laèn. Reðaksi parcajâ jhâ' carèta, pamèkkèran ðâri para panyerrat kengèng abhânto dâ' kamajuwân orèng Madhurâ bân bhâsa Madhurâ.

Èdisi panèka jhughân bisa èsebbhut âdisi duka cita amarghâ sala sèttong ðâri rèdaktur èngghi panèka Bapa' Adrian Pawitra ampon adhingghâl dhunnya. Salèrana ampon aparèng kontribusi sè rajâ tor ta' kabitong dâ' Majallah Jokotolè. Molar mogha, amal jariyâ salèrana ètarèma tor èbâles sareng ghustè Allah SWT sareng bâlessân sè samporna. Molar moghâ jhughân, lègasi ðâri Bapa' Adrian Pawitra èngghi panèka samanget sareng cita-cita bhâdhi mamajuwâghi Polo Madhurâ khususèpon bhâsa sareng sastra Madhurâ bisa pagghun èterrossagi sareng kita sadhâjâ. Amin.

Tim Rèdaksi Jokotolè

Bhasa Jhaba	Bhasa Bhali	Bhasa Sondha	Bhasa Madhura
Banyu	yeh	cai	banyo
Sarujuk	adung	akur	sarojuk
Rukun			rokon
Perabot	perabot	perabot	parabhut

Dari vokal /I/ pas aoba dhaddhi /é/ akadhiya oca'-oca' é baba panéka:

Suci	soccé
Tali	talé
Guci	gucé
sapi	sapé

**Oca'** Sé para' pada'a bujuddha dari badhana monyé vokal /i/ aoba dhaddhi /é/ namong épangghi'i dari Bhasa Jhaba dan Bhasa Madhura. A'obana sowara /i/ ka sowara /é/ namong bada é dalem oca'-oca' sé dari Bhasa Jhaba da' hasa Madhura. Anangéng, dari Bhasa sé laénnépon, kadhiya dari Bhasa Jhaba da' Bhasa Bhali, dari Bhasa Jhaba da' Bhasa Sonda ta' épangghi'i. Nanging ta' kéngéng pas époket jha' oca'-oca' sé nodhuwaghi padana salén sowara dari monyé /i/ sé aoba ka monyé /é/ namong bada neng oca'-oca' sé ampon kasebbhut é attas. Parlo panalektéghan sé langkong parjhugha ma'lé bada toladha sé langkong balatra tor ghenna'.

Salastaréna abhabbhar ra-tora sé aropa horop odi' otaba vokal sé épangghi'i é dalem

Bhasa Sondha, Bhasa Bhali, Bhasa Jhaba, sareng Bhasa Madhura, masté'épon kodhu ésaré jhughan ra-tora sé aropa horop maté (konsonan) sé bisa sé bisa ébhadhi tandha badana hubungan famili éyantarana.

Sa'amponna étaléktéghi, jhughan épangghi jha' é dalem 4 bhasa sé ékamoskél bada jhugan horop maté (konsonan) sé kéngéng ébhadhi tandaépon hubungan saparmiliyanna Bhasa Sondha, Bhasa Bhali, Bhasa Jhaba, sareng Bhasa Madhura. Horop maté sé ékamaksod akadhi bhabbharan é baba ka'dinto.

Horop /w/ aoba dhaddhi /b/

Bhasa Jhaba	Bhasa Bhali	Bhasa Sondha	Bhasa Madhura
tawas	tawas	tawas	tabas
tawa		tawar	tabar
wadhl	campah		badhul
uwan			oban
awan			aban

Bada jhughan sowara /y/ sé a'oba dhaddhi /j/, akadhi toladha sé baba panéka:

**Bhasa Jhaba      Bhasa Bhali      Bhasa Sondha      Bhasa Madhura**

Percaya  
Caya  
Kaningaya  
Layangan  
Jaya

parcaja  
caja  
kanéyaja  
lajangan  
jaja

A'obana sowara /y/ dhaddhi /j/ bisa ékocaaghi paroba'an dari monyé *schwa* sé é dalem bhasa Inggris ésebbhut *glide*. Monyé ka'into ékaollé dari badana monyé /i/ pas aghuli ka attas nojjuh ka sowara /a/. Sabellunna dapa' ka monyé /a/ pas kaocap sowara /y/. Sowara /y/ ka'into sé pas a'oba /w/ dhaddhi /j/, dari sowara schwa pas dhaddhi konsonan asowara tor ledhu'

(bunyi plosif).

Salaénnépon sowara /y/ sé aoba dhaddhi /j/, jhughan épanggħi'i

Bada sowara /w/ é dalem bhasa-bhasa sé ékamoskél é dalem to; ésan panéka aoba dhaddhi /b/ é dalem Bhasa Madhura, akadhiya toladha é baba ka'into:

<b>Bhasa Jhaba</b>	<b>Bhasa Bhali</b>
Warta	warta
Warung	warung
Watak	watak
Wujud	wijen
Wijen	wijen

<b>Bhasa Sondha</b>	<b>Bhasa Madhura</b>
wartos	bertha
warung	barung
watak	batek
wujud	bujut
wijen	bijjan

A'obana sowara /w/ dhaddhi /b/ bisa ékocaaghi paroba'an dari monyé *schwa* sé é dalem bhasa Inggris ésebbhut *glide*. Monyé ka'into ékaollé dari badana monyé /u/ pas aghuli ka attas nojjuh ka sowara /a/. Sabellunna dapa' ka monyé /a/ pas kaocap sowara /w/.

pada otaba mébhis monyéna tor arténa. Nangéng, sareng Bhasa Sondha, jhughan sareng Bhasa Bali, bada jhughan oca'-oca' Bhasa Madhura sé pada, nangéng jumlahépon sakodhi', Mélana, dari bhukté sé korang parjugha ka'dinto, kennéng époket jha' Bhasa Madhura sareng Bhasa Bhali tor Bhasa Sonda abak jhau hubungan saparmiliyanna. Nangéng, é laén bakto parlo épakompol polé bukté sé langkong bannya' tor parjughha.

### Pokeddhan

E dalem bhabbaran séampon kaserrat bhuru ampon ékaonénéjha' Bhasa Madhura cé' semma'na sareng Bhasa Jhaba. Bisa époket saka'dinto polana cé' bammya'na oca'-oca' sé

Malang, 25 November 2023

*gadang'* Minangkabau. Dâri jâreya ko-bengko è tanèyan lanjhâng Madhurâ ghellâ' èkennèng koca' para' pađâ'â moso mar-kamarra sèttong *rumah gadang* Minang, sè bâng-sèbângnga èberri' ata' bi'-dhibi'. Dâri ghi' awwâl, mar-kamar bânnya' sè èjhâjhâr è pèngghir buđina bengko rajâ jârèya ella abit siyap narèma maso'na manto lake'.

È tanèyanna rumah gadang bâđâ lombhungnga pađi, tapè tađâ' langghârrâ. È Minangkabau langghâr—sè è đissa' èsebbhut *surau*—biyasana èpaddhek tor èka'anđi' sèttong ghuru ngajhi. Salaèn èghabay kennengnganna morok, surau jârèya—sè kaprana aokoran rajâ—èghuna'aghi moso rèng-orèng satatanggâ'ânnna ka'angghuy asambhâjâng sè lèma bakto. Saterrossa, surau jarèya èsađiyâ'âghi kèya ka'angghuy kennengngan ngènep na'-kana' sè molaè dhibâsa, sarta lalakè'an laènna sè ghi' ta' aksa-bengko, sè bânnya'na bisa sampè' saèket orèng. È bulân powasa, surau biyâsana lebbi rammè polè sabâb bânnya' orèng sè noro' abhâjâng tarawih bân atadarus.

Mon ètalèktèghi sarta èđhing-bhândingngaghi lebbi jhâu, saongghuna orèng Madhurâ bân orèng Minangkabau lakar bânnya' kamèmperanna. Orèng Madhurâ bân orèng Minang đâ-pađâ kalonta talèbât kokona ajhâlannaghi ibâdâ aghâma Islamma; tapè saèstona abâk bânnèyan sabâb orèng Madhura kabanya'an maso' Nahdlatul Ulama, mon orèng Minang kaprana noro' Muhammadiyah. Pađâ sareng orèng Madhurâ sè senneng alolongo ka jhâuna ka'angghuy nyarè kasap kalabân mèkol rompong ajhuwâlan satè bân soto Madhurâ, mon

orèng Minang cè' segghuddhâ ètangalè mokka' *rumah makan Padang* è ma'-đimma'a bhâi. Bhâsa Madhurâ bân Bhâsa Minang pađâ bânnya' aghândhu' parèbhâsan', tapè bidhâ sè cè' katarana katon polana orèng Minang lebbi ter-pènter sarta bânnya' sè dhâddhi sastrawan kalonta sè ta' bisa èsaingi orèng Madhurâ.

Saongghuna cè' èmanna ongghu sabâb kasoghiyân buddhâjâ bân paradhâbhân tanèyan lanjhâng sarta rumah gadang rèya bhâkal èlang. Sajjheggâ jhâman rèvolusi kamardhika'an Indonèsia, sajân talèbât malaraddha nyarè, nemmo, tor ngaollè tana lèbâr ka'angghuy èkaghâby tanèyan lanjhâng anyar. Bâriyâ kèya rajâna baraghât sarta tengghina ghâ-arghâ bahan pamaddhek babengkon rajâ, cè' èghârâssana bhâkal mamostaèl kèya bhâkal bâdâna rumah gadang anyar....

### Sombher Postaka

- Radjab, M. 1974. *Semasa Kecil di Kampung*. Jakarta: Balai Pustaka.  
Rifai, M.A. 2007 *Manusia Madura*. Yogyakarta: Pilar Media.  
Rifai, M.A. 2017. *Lintasan Sejarah Madura*. Bangkalan: LPPM UTM  
Rifai, M.A. 2021. Kanyalendhâânnèpon korsè pangantan Madhurâ. *Jokotole* 25; 13 – 14

# "Andhâp Asor Lalampaṇa Sopan Santun è Madhurâ"

Hidrochin Sabarudin

Andhâp Asor sè èkamaksod nèng ka'đinto ènggi panèka lalampaṇa tatakrama sareng *sopan santun* sè ampon èajâragi sareng para seppo orèng towa ka para potra bân potrè èpon sopajâ ngormadi ka orèng sè langkong seppo, parmèla dâri panèka lalampaṇa orèng Madhurâ ka'đinto ampon bâdâ dâri dhimèn.

Sala sèttong conto èngghi panèka bhâdhân èparendâ sakonè' manabi lèbât ajhâlân è adâ'na orèng sè langkong seppo, ghulina bhâdhân sè èkamaksod sareng andhâp asor panèka èngghi ka'đinto masang bhâdhân mabungko' sakonè' kabâbâ sareng nyabâ' tanang sè kanan loros èadâ' nojju kabâbâ dhinèng tanang sè kacèr èsabâ' kabingkèng èattassâ tengnga, pas lajhu ngoca' "Ghâlânô (manabi Pamekasan, Sampang tor Bhângkalan) sareng Pangapora (èyangghuy è Sumenep)".

Èbâktona ajhâlân semmo bhâdhân semmo bungko'na panèka kodhuna ajhâlân/alomampa laonan bânnè pas lajhu aberka'. Hal panèka carana orèng Madhurâ sè ngođâ'an èdhâlem ngormadhi sè langkong seppo manabi pas lèbâdhâ èyađâ'na. Sè langkong samporna ngèrèng kasokan ngoladi gâmbârâ nakkanak sè lèbat panèka.

Èdhâlem ka sa-arèyanna è masyarakat Madhurâ, orèng sè lebbi ngođâ lakar mabungko'

bhâdhân sakonè'manabi lèbât è adâ'na orèng sè langkong seppo, ètika panèka lakar manabi ètèngalè sanget èntèng, namong saèstona ètika panèka nyarbâ'aghi lalampaṇa orèng sè saè, salaèn dâri panèka ghulina bhâdhân sè semmo bungko' panèka nandhâ'aghi jhâ' lakar orèng panèka ngârghâi sareng nyabâ' bhâdhân sè parjughâ (Zaairuh Haq, 2001:24).

Namong è jhâman samangkèn panèka bânnya' para ngođâ molaè adhingga'l'aghi ètika sareng tatakrama sè cè' saèna ka'đinto. Saèngghâ aromassa ta' parlo polè ngalakonè lalampa sè ampon èparèngè bâburughân sareng orèng seppona sè molaè ghi' na'-kana'. Ponapa polè samangkèn ampon bânnya' na'-kana' otabâ para ngođâ manabi ajhâlân sakarebbâ dhibbi' jhârnajjhâ akadhi perrèng tongghâ'ân ajhâlân. Saèstona panèka dâri pangarona bhudâjâ sè dâri luar, panèka sè maghâbâyân tatakrama sareng solana bhâdhân para ngođâ è Madhurâ dhâddhi aobâ.

Parmèla dâri panèka samangkèn kodhu pènter mèlè sareng nyarèng budhâjâ sè ampon masok wabil khusus èpon ka đisa<sup>2</sup> sè jhâu dâri koṭṭhâ, nyarèng sè saè sareng mowâng sè sè korang parjughâ, sopajâ *sopan santun* sareng tatakrama orèng Madhurâ pagghun èjâgâ'â è dâlem lalampaṇa sè langkong parjughâ ka'đinto.



## PASÈSÈR LOMBÂNG SÈ APAGHÂR CAMARA ODÂNG

Angghidhân: Harkoni Madura

Mosèm notobhân bhâkal dâteng. Ponapa para maos ampon nantowaghi dâ'ka'dimma bhâkal apalesséra? Manabi bellun mangghi, ngèrèng ajâ' kanca otabâ kalowarga ka'angghuy nyepper ka Pasèsèr Lombâng.

Nojjhu ka engghun panèka, manabi para maos lèbât jhâlân Batu Lenger ta' abit mangghi pertellon Belukaras. Lajhu abhiluk kangan nojjhu jhâlân rajâ Dasuk, Manding Sa'amponna pan-

saponapan mennit, dhabâ' nèng partellon Manding. Para maos ngèrèng jalur kangan ka jhâlân rajâ Manding jurusân Bâto Potè, Saterrossèpon dâpa' ka lapangan ebbal Tang-Bhâtang (Batang-Batang). Pas lajhu abhiluk kacèr ka jhâlân raja Ghâppora, Tang-Bhâtang. Sa'amponna dâpa' nèng parapadhân Pasar Legghung Tèmur, abhiluk kangan. Dukilo agghi' para maos bhâkal ngoladhi papan atolès" Pasceser

Lombâng". Pas abhiluk ka kacèr. Sa'amponna ka'dinto para maos coma bhuto bâkto sakejjhâ' ka'angghuy dâpa' ka Pasèsèr Lombhâng.

Pasèsèr Lombâng aropa'aghi sala sèttong pa'anabhân sè ponjhul è bhumè Sumekar. Kaponjhulân pasèsèr ghâpanèka aghâdhuwèn beddhi potè alos sè ngampar kalabân lanjhâng korang langkong 12 kilometer sarta ombâ'na kènè'. Salaèn acèbbhung, para maos bisa ajâjhâl *snorkelling* saèngghâ bisa ngarassaaghi èndhâna paanabhân è dâlem tasè' Pasèsèr Lombhâng. Ajjâ' kabâtèr tako' kapanasân, para maos bhâkal èpjungè ghumbhussâ camara oðâng sè ajhijhir è sakalènglèngnga bibirrâ pasèsèr ghâpanèka.

Bâjâ lagghu arè nyonar terrang. Kaèndhâ'anna makasambu' rèng-orèng ka'angghuy maèlang rassa bhusen sa'amponna

lastarè alako sa'arè. Aobbhâ bhungkana camara oðâng sè maseggher kabâdâ'ân. Sadhâjâ panèka bâdâ nèng pa'anabhân Pasèsèr Lombhâng, sè aengghun neng Kabhupatèn Songennep, Madhurâ, Jhâbâ Tèmor.

Pasèsèr ghâpanèka dhâddhi jhujhughân *wisatawan* amarghâ èpossa'è kalabân camara oðâng, angènna sè cellep sarta beddhi potè alos sè lanðâi. Nèng ka'ðinto *wisatawan* bisa nompa' jhârân ngâlèlèngè pasèsèr nojjhu ngarassa'aghi pa'anabhân kalabân ta' ajhâlan soko.

Salaèn ðâri ghâpanèka para maos jhugân bisa ngarassa'aghi *wahana* sè èbhângon nèng *area* pasèsèr. Fasilitas ka'ðinto èbhângon sarèng *Pemkab* Songennep ka'angghuy masenneng *wisatawan*. Pasèsèr Lombâng aèngghun lerresèpon è tèmorra Songennep, korang



Kabâdâ'anna bersè tor èndhâ, Sambi akoto' ka Samman bhâb roma sè bâdâ èyađâ'na mata.

“Pojhur ongghu Ka', ya' bâdâ roma kéné nangèng bherse, mandhâr bâdâ'â orènga”, Samman sè ta' nèngalè ghun pèra' pèrak sambi asokkor dâ' Sè Amorbhâ Alam.

“Pangapora”, oca'na Sammin kalabân pangarep mandhâr bâdâ'â sè ajâwâb. Ta' sa'apa abiddhâ dâri dâlem bâdâ orèng bâbinè kalowar sambi ajâwâb salamma Sammin. Salérana ampon cokop seppo nangèng kaoladhânn ennom, sambi mèsem ngatorè alèngghi.

“Saporana Nyaè abdhina posang tasasar kantos dâpa' dâ' ka'dinto” oca'na Sammin”. Orèng binè' sè èsambhât nyaè mèsem.

“Dâri ñimma bâ'na ma' bângal maso' ka dâlem alas” pètanyana Nyaè saellana Samman bân Sammin toju'.

Samman lajhu acarèta molaè dâri kabâdâ'âna sè ta' andi' orèng towa kantos kalakowan sabbhâan arèna sè abhurumaèn ka'angghuy kasap kaođi'âna. Saterrossâ acarèta ngèngèngè kadhâddhiyâna sampè kasasar maso' ka dâlem alas. Nyaè ngèdingngaghi sambi ngatorraghi aèng anga' sè manès. Samman bân Sammin kasambu nalèka ngènom aèng sè èparèngè Nyaè, rassa lapar tor pelka' èlang ñhâksakala. Nyaè ghun pèra' mèsem ngabâssaghi Samman bân Sammin sè kasambu' semmo ghetton.

“Cong...., dhâddhi orèng nèko kodhu panarèma, asabâb manossa ghun coma dhârma, ajhâlânè napè sè pon ètantowaghi sareng Ghustè Pangèran, sokkorè sakabbhina sè èparèngngaghi ajjhâ' kongsè kaloppaè ka asalla, akantha kacang

kaloppaè ka kolèna”, Samman bân Sammin pađâ ngèdingngaghi bâburughânn Nyaè.

“Madđhâ dhika nedđhâ ghâllu, samarèna nedđhâ ñâggî' dhika ollè molè, bi' bulâ èberri'âna tao jhâlân ka'angghuy molè ka kampongnga dhika”, oca'na nyaè sambi makalowar nasè' sapèrèng jhuko' lang-tolang. Ngèding bâuna massa'anna nyaè tabu'na sè kađuwâ pas lajhu lapar sakalèng adâ'.

“Nedđhâ panyaman ajjhâ' arebbhu'ân bân ajjhâ' atokaran” parèntana nyaè.

Nèngalè kakakan nyaman, Sammin loppa dâ' bâburughânn Nyaè, ñhâghingnga èpalaèn pas èkakan dhibi, dhinèng lang-tolanga èbâghi ka Samman sè ta' ngatèla. Samman sèngakan tolang ngèkkè sambi jhen-ejjhennan dhâghâ matana mancella' pas cekka' mella' bisa nangalè. Nèngalè alèna ngakan dhâghing atèna aromassa pegghel amarghâ ècokoco sareng Sammin, tolang sè èkèkke' ètokollaghi ka tengngana lajhu loros soghâ' ta' bungko' polè. Sè kađuwâ pèrak talèbat amarghâ ta' buta bân ta' bungko.

Nyaè sè molaè ghellâ ngabâssaghi kadhâddhiyâ, mèsem pas ađhâbu dâ' Samman bân Sammin.

“Cong...., sanonto dhika tekka hajhât, ta' buta bân ta' bungko'. Bulâ noro' bhunga, nangèng ajjhâ' kongsè dhika kaloppaè sè asokorra amarghâ ghânèko mènangka kadhâddhiyâ sè ta' kappra. Sakalèyan agghi' sèngko' messen ajjhâ' mara kacang kaloppaè ka kolè'na, artèna ajjhâ' kongsè kaloppaè ka asalla. Kalamon dhika kaloppaè ka asalla bân èlompa' bhunga kantos loppa sè asokorra, bulâ kabâtèr dhika bhâkal abâli ka'asalla polè mala sajhân nyangsara. Lamon dhika terro molèya ka romana, tèngghu

arè bâdâ è ñimma pas dhika ajhâlân amongkorè arè, mon dâpa' ka pèngghirrâ alas jhujhuk ngacèr noro' lorossa lorong".

Lastarèna abu-dhâbu, dhâksakala Nyaè ghellâ' pas èlang, roma tor sadhâjâ èssèna jhughânan èlang akarè Samman bân Sammin wâ'-duwâ'ân è dâlem alas. Sè kaðuwâ pâdâ patang abâs takerjhât amarghâ kadhâddhiyân sè ta' maso' dâ' akkal pèkkèranna. Sowarana Nyaè sè abu-dhâbu ghi' cè moðdhâna acora' bâdâ è sakobengnga alas, nangèng nalèka èsarè ghun pèra' monyèna un-ðâunan ètambu angèn. Samman bân Sammin laju ajhâlan mongkorè arè norodhi dhâbuna Nyaè.

Samman bân Sammin ajhâlan sambi jhung-kéjhungan loppa dâ' bu-dhâbuna empa' ka'angghuy tè-ngatè, ngastètè tor pabânnya' sokkor dâ' Ghustè Pangèran. Salanjhângnga lorong lakona pèra' atangdhâng tor ngèjhung, rak-oraghân. Bân-kèbân paðâ takerjhât buru amarghâ sowarana Samman bân Sammin sè lako ayèra'. Sè kaðuwâ aromassa senneng nèngalè bân-kèban paðâ buru tako' ka sowarana.

Bâjâ Ashar Samman bân Sammin dâpa' dâ' pèngghirrâ alas, dâri sennengnga dhâghâ kaloppaè sè ngakanna. Sè kaðuwâ nyandâr toju' è bâbâna bhungkana accem. Tabu'na amonyè rot-corodhân, pelka' bân lapar bhuru èghârâssa.

"Sèngko' lapar Lè' oca'na Samman ka alèna Sammin.

"Paðâ Ka', tapè nyarèya ñimma kakanañ, jhâ' iyya' taðâ' roma sakalè", jâwâbbhâ Sammin.

"Pola bâ'na naè' bhungkana accem arèya Lè' buwâna acora' lebbhâ', kennèng let-salet tambhâna lapar".

Ta' mèkkèr lanjhâng Sammin laju naè' bhungkanna accem, dâpa' ka attas accemma èpolong pas èkakan. Amarghâ célo' matana Sammin cer-kècerrañ sambi meddhem. Nangèng palang matana sè akècer sambi meddhem pas cekka' polè. Sammin posang amarghâ ta' nangalè, matana buta paðâ bân sè asal.

"Ka', ya' sèngko' buta polè ta' nangalè apa", oca'na Sammin athowwat dâri attas bhungkana accem.

"Neggħu'i Lè' tako' labu", oca'na Sammin ka alè'na. Sammin posang nyarè panegħu'ân, nangèng palang sè ètegħu' teppa' ka ranca' sè kerrèng kantos Sammin ghâggħâr labu dâri bhungkana accem. Nalèka Sammin labu, Samman sè bâdâ è bâbâna accem ta' jhâpo' nyènla kantos èghâggħâri merrè ka tengħġana Samman pas bungko' polè. Samman bân Sammin abâli ka asalla buta bân bungko'. Sè kaðuwâ bhuru ènġa' dâ' bu-dhâbuna Nyaè nalèka bâdâ è dâlem alas. Kasta ampon taðâ' paðâ, nangèng ghun pèra' karè kastana. Samman bân Sammin ajhâlân atong-rontong noro' lorong molè dâ' kampongħa. Sammin sè bungko' nonton Samman sè buta, ajhâlân abħurumaèn nyarè kasab kalabâñ ngantos kabellâssânn orèng laèn.

.....ooooOOOoooo.....

Bâburughâñ beccè:

1. Ajjhâ' kongsè mara kacang loppa ka kolè'na, kaloppaè ka 'asalla.
2. Pabânnya' asokkor dâ' Sè Amorbhâ Alam.
3. Taðâ' kasta èyadâ' nangèng kasta pagħġun bâdâ è buđi.

# Kembhângnga Lorong

Angghidhan: Mudhar CH\*

Ènten bannè nyama dhagging ðari babinè' sè akolè' celleng seddha' jarèya. Ta' tao ghan bila aba'na aoba èolok Ènten. Satèya orèng la ta' èmo' ngènga'è sapa sè sanyatana Ènten. Kabbhi rèng lakè' mon sampè' acaca wa'-ðuwa'an ban Ènten - sanajjhan ghun sakejjha' - masthè dhaddhi għilana. Kapèkkèran sèyang malem. Rèng lake' mon nangalè robana Ènten masthè ngalođu' èber.

Ca'na rèng-orèng sè ghila ka Ènten, ta' kowat mon ngabas matana. Pangapèncotta Ènten bađa è matana. Matana morka'. Bulu kèjha'na maletthet. Alèssa andaun mèmbha. Èlongnga, pèpèna, bibirra jherruk salonè, pamèseemma macaltong atè, lè'èrra ghulu manjhangan, lengngenna, tanangnga, għarighi'na angrajhung quri, palèmbayya, bangkongnga ambhukor nèngnep, bettessa, pajhalanna tađa' calèyanna. Sakabbhinna nyennengngagħi.

Bannya' orèng ngoca' jha' mon Ènten rèya nyatana pegghel ka sè lakè'. Satèya dhaddhi babinè' rosak amargħa èyajhari sè lakè'. Sabellunna dhaddhi babinè' lorongan, Ènten arop'a għi babinè' sè lakona aokep è romana. Babinè' ta' pajhalanan. Ta' toman kalowaran.

“Ma' bisa lakèna sè ngajhari, Bhuk?”

Sakejjha' Ènten neng-enneng. Aba'na cora' ngen-bangennan. Nga'-ngènga'è kadhaddhiyan pèttong taon sè tapongkor. Ngalođu' èber rassana paè'. Lebbi paè' ban kettar ðari mèmbha, binahong, ban jhila bhaja. Ba'ang la-ngalaè landħana kapor. Ghighi attas èyaddhu ban ghighi baba. Ngèret tađa' sè èkaél. Ðari matana kalowara aeng mata tapè Ènten pagħġun ta' nangħes.

“Engko' satèya Ènten, bannè engko' sè dhullu. Bannè babinè' genċeng sè ghun eco-koco orèng lakè'. Dhullu Engko', Lè', akabin omor għi ngođa. Bhuru lulus SMA engko' alakè. Alakè orèng soghi èjhu dhuwagħi majhađi'. Amargħa lalakè' jarèya sengko' dhaddhi babinè' lorongan.”

“Ma', ma' bisa wa, Bhuk?” Na'-kana' ngođa cora' ta' ghenna' omor atanya kalaban jhalujjhu' ka Ènten sè la qlied-aħżejjha bađa è kasor.

“Tang lakè jarèya, Lè', ana' sèttong kabbhiyanna. Sengko' marè akabin noro' kon mattowa. Apolong roma sèttong è bengkona mattowa.”

Ènten mendhekk sè acaca. Aba'na makompol kadhaddhiyan pan-barampan taon sè la lèbat. Bannya' dhuwa tor pangarep ðari rèng

seppo, majhađi', ban po-sapopona sè lakè'. Mogha dhaddhiya lalakè' sè pèlak. Kalakowan-kalakowan ta' ejap sabellunna abinè parènga lobar. Babatek-babatek ta' genna sabellunna ođi' ban Ènten parènga lebbhar. Tèngka pola-tèngka pola sè ta' lebur bakto ghi' lancèng parènga ta' èkalako nalèka ala-bhala, saellana èyakat kabin kalaban babinè' tada' panyalèyanna, sè satèya èsebbhut Ènten.

“Sabulan abiddha tang lakè jarèya kabilang lakè sè beccè'. Saellana sabulan tang lake molaè atèngka...”

Lakèna Ènten molaè bu'-mabu'an ban sakanca'anna. Carètana par-èpar sapopona ban mattowa majhađi'na, lakèna Ènten lakan la biyasa ođi' mara jarèya. Dalem bakto sabulan po-sapopona sè lakè' aromasa asokkor sabab sapopona anteng è roma. Ta' kalowaran, ta' bu'-mabu'an, ban ta'... ta'... sè laèn.

Ènten ghi' bisa sabbhar. Ènten maènga' sè lakè' ka'angghuy ta' bu'-mabu'an. Sajan abit bannè sajan bhender. Tèngkana sè lakè' sajan ta' ro-karowan. Salaèn bu'-mabu'an, lakèna Ènten dhujan amèn pèssè. Dhujan kèya bur-lèburan kalaban babinè' laèn.

Jhaman satèya nyamana potona sè lakè' atalabuyan orèng ngèrèm ka Ènten. Bađa sè teppa' nom-ènoman. Bađa sè teppa' arèba babinè', yom-sèyoman, ban maso' ka hotèl. Mènangka manossa biyasa, kasabbharanna Ènten abates. Èyanđhiyaghi ka bađđha, tanto bhakal ngalowa ompama terros èyèss'è. Bariya kèya kasabbharanna Ènten. Ngalowa ta' kabuwa'.

Sè palèng maseksek ka dađana Ènten mon berta ban poto ta' bhenderra sè lakè' bađa ngèrèm ka ghalimpo' whatsapp ca-kanca SMA-na. Ènten ta' bannya' kandha, lakan la dasarra

Ènten bariya. Tapè ca-kanca rakeddha Ènten masthè atanya lèbat nomerra dhibi'. Kađhang lèbat whatsapp, bannya' kèya sè nélpon. Èjadiya biyasana Ènten nangès.

Sèttong bakto Ènten ka pasar èyajhak mattowa binè'na. Mattowana abalanjha kabhutowanna dapor. Ènten aromasa sakonè' senneng. Atèna ta' sompek. Pèkkèranna ta' ghun lako ènga' ka sè lakè' sè la pan-barampan arè ta' molè. “Cè' raddhinna mantona. Ma' pènter pottrana nyarè binè, Jhi? Pèlak!” Oca'na rèng jhuwal jhindhul ka mattowa binè'na.

“Nemmo bhai dhika, Lè'. Ngghi nèko, alhamdulillah... rajhekkèna Kacong ban sè sabhala,” saoddha mattowana Ènten sambi mèsem. Ènten pađa noro' mèsem. È atèna aghađek, “Mon rèng raddhin, ya pagghun raddhin. Makkè sè ngoca' iyya pađa raddhin kèya. Raddhin robana terros raddhin ka pacacana. Ma' ce'leburra!”

Ta' abit sa'apa bađa è pasar mattowana ngajhak molè. Sabellunna molè Ènten ètarè pola bađa sè èkaterrowè. Pola bađa sè èbelliya, “Bhunten, Mi. Ampon, torè manabi palèmana,” jawabbha Ènten ka mattowana.

Molè napa' ka romana, lakèna bađa è dalem kamar kalaban babinè' laèn. Wa'-duwa'an ban babinè' è dalem kamar kennengnganna dhibi'na ban Ènten. Atèna sapa sè ta' sakè'a. Babinè sè kemma sè ta' pegghella. Cèthakka sapa sè ta' ngalkalla. Nangalè kadhaddhiyan jarèya, Ènten buru sambi nangès. Napa' ka labangnga paghar tagheppok ban mattowa lakè'na. Ènten dhuli ècandhak. Arondha li-baliyan Ènten buruwa. Tegghu'anna mattowa lakè'na sajan sekken. “Antos, Bhing! Ba'na ollè pegghel ka sè lake', kèng satèya ba'na jha' da'emma'an ya, Na'! Sèngko' mattowana, Bhing, kèng asapora'a ka

ba'na. Saporana, Na'!"

Sajjhingga kadhaddhiyan jarèya lakèna Ènten bannè sajan bhender. Sakalèyan èghenna'è ðukalè. Ðukalè èpadhaddhi tello kalè. Roman libiliyan, èkarassa nyaman li-baliyan. Roman libiliyan, bila toman li-baliyan.

Eppa' embbu'na Ènten ban mattowana sakalè la ta' ka'ada' sè ngajhum tarèsnana na'-kana' sè kaðuwa. Sajjhana Ènten matabukka'a atèna lakèna. Nyajhal ngèba rèng lakè' ka romana. Sè lakè' ngamok. Lalakè' sè èghiba Ènten sè sanyatana sapopona dhibi' para' èkennènga penthong ban sè lakè'.

Lakèna Ènten bisa tambhuruwan tapè pagghun ta' aoba. Ta' abit sa'apa la ngèba babinè' laèn polè ka romana. "Dari jarèya, Lè', engko' buru ðari bengkona tang lakè. Engko' ta' molè ka roma. Engko' mèlè odi' è jhalan. Ca'na dhibi' ollè ta' sompek. Bannya' kanca ollè ta' ghila. Nyatana, raja parsèkona babinè' odi' è jhalan.

Odi' è jhalan bhandhana raja. Engko' bhuto pèssè. Engko' molaè ajhuwal apa sè bisa èjhuwal. Ði-budina lako bhadhanna engko' èjhuwal sakalè. Mon lakar bada naraka, engko' rèya orèng sè bhakal dhaddhi rè'-kerrè'na naraka." Ènten neng-enneng. Mèlget sakejjha'. Mata morka'na narabang, mandheng ka ada' ta' abates. Ma' polè ghun gheðdhung, ghunong sakalè ètarabhas kalaban pangabasanna, "Kèng engko' jha' cabbur ka naraka kadhibi', Lè', lakèna engko' kodhu cabbur ka'ada'. Lakèna engko' se ngajhari engko' dhaddhi mara arèya."

Aèng matana molaè ghagghar ka pèpèna, "Bha' bisa'engko' kalowar ðari kabaða'an arèya? Sapa sè narèma'a engko'? Odi'a è ðimma engko' mon ta' ghun kaoði'an lorong? Dari lorong maso' ka hotèl. Abali polè ka lorong. Maso' polè ka

kennengngan ènga' arèya. Kennengngan sè pa'-empa' sakaban ban kalakowanna engko'. Maso'a ka masjid? Buru kabbhi orèng. Cemmer masjid mon èdhiddha' tang soko."

"Iyya enja', Bhuk. Arapa ma' buruwa? Arapa ma' cemmera?" Na'-kana' lakè' jarèya sambi masemma' molèsa aèng matana Ènten. Sabellunna nyeddhing ka pèpèna, tanangnga na'-kana' jarèya dhuli ètegghu' ban Ènten.

"Hm... ta' ghun ca'na ba'na. Orèng è masjid orèng soccè kabbhi, Lè'. Ba'na sèttong sè enda' ngèdingngaghi ban nanggha' tang kaoði'an. Jarèya bhai apa ca'na ba'na, parcaja iyya, ta' parcaja iyya. Kemma bhantal engko' tèdunga è baba."

"Tèdung ðinna', Bhuk!"

"Enja'! Omorra ba'na saomorra tang alè'. Ba'na na'-kana' beccè'. Mon enda', ba'na èyangghebbha alè' ban engko'."

"Bhuk!"

"Dung-tèdung! Ba'na ghi' akuliya, kan?" Sapo' ban bhantal ghuling èsampattaghi rapa' ka mowana. Ènten dhuli marobbhu è baba ta' alama' pa-apa.

\*\*\*

Para' sèyang na'-kana' lakè' jarèya jhagha. È baba Ènten la taða'. Baða pèssè lèma ratos èbu è attassa bhantal sè èyangghuy Ènten. Kana' jarèya dhuli ngala' hp-na nélponna Ènten. Baða pessen maso' è télponna na'-kana' jarèya, "Engko' ètangkep, tang hp èrampas. Saellana kadhaddhiyan jarèya sè sabbhan arè na'-kana' lakè' kasebbhut nyarè kabhar otaba berta ða' emma ban è ðimma Ènten èsaba' sarta baramma kabaða'anna satèya.

# GHÂBÂNGAN

Angghidhan Jufriadi



Ampon tello bulan Bardi sè ala-bhala sareng Misnati, orèng binè' kembhangnga kampong. Bardi aromasa ontong bisa ngaollè paraban sonthè, amargha aba'na aromasa jha' orèng biyasa, ghun pèra' andi' tarèsna. Ongghu ta' ghampang Bardi ngaollè babinè' raddhin, amargha Misnati salaèn kembangnga kampong, jhughanan dhaddhi rebbhu'an orèng lakè'. Ta' namong lancèng kapaceng sè terro alamara ka'angghuy dhaddhi lakèna, sanaosa sè ampon andi' binè ghi bannya' sè aghalunyo' èber ka'angghuy ngaollè Misnati.

Malem, è tèra' bulan pornama, langngè'na bhersè, ondém potè mara kapas ajhalan rak-araghan nambai senneng ka sè ngabas. Bardi sareng rajina açon-jandon è tanèyan ngarassa'aghi èndhana pa'anabhan. Kobhi anga' sareng kellana tenggang nambai sennengnga duwa' atè sè lagghi'

kabilang mantan anyar.

“Saporana alè' bula ghi' ta' bisa mabhunga odi'na dhika”, oca'na Bardi, ka binèna sambi manyandar binèna ka ԁaðana, Misnati mèsem sambi ngabas ka sè lakè'.

“Tarèsnana dhika da' bula mènangka arta sè palèng otama. Dhunnya bisa èsarè ka'!

“Iya lè, tapè korang samporna manabi kakorangan arta, mèlana bula terro nyona èdhì ԁa' dhika ka'angghuy nyarèya saraddha odi'.

“karebbha dhika bula korang ngartè, ka”

“Bhula terro alakowa ka naghara manca, lè!”

“D h i k a a d h i n a ' a g h i n a b u l a k a ? ” , sangghemmannna Misnati, aèng socana ghagghar ta'ègharassa.

“Bhunten lè', bula ghun terro mabhunga'a dhika, bula ta' kowat ngèdingaghi cacana tatanggha sè malolo arasanè bhula sareng dhika”.

“Bula tako'ta' kowat ka', manabi tada' dhika èseddh'i'na bula”.

“Bula parcaja dhika orèng sè sabbhar lè', bhuktèna dhika narèma da' kabaða'an bula.

“Tapè bula babinè' ka' sè bhuru ngarassa'aghi tarèsnana dhika, ma'pas tègha dhika sè adhina'a bula”, aèng matana tambo dherres mabacca atèna Bardi, caltong! Caltong! Nangèng manabi ènga'

ka cacana tatangghana, atèna onga' pas nèyaddha sajan bungkol ka'angghuy mangkat ka Malaysia nyarèya lako masamporna'a kaprana lalakè akasap nyarè balanjhana sè binè'.

Sabatara ka'dinto lakona coma ađantos sorowan lako. Manabi bađa rējhekkè, èngghi alako, manabi tađa' orèng nyoro ghun pèra' abharengngè sè binè' è roma. Rassana todus tađa' madhanè.

Misnati dijem ghimeng. Atèna abhenderradhi pamangghina sè lakè', tapè atèna berra' amargha dhibi'na arassa jha' bannya' cobhana manabi edhina'aghi kadhibi'.

"Napè è Madhura ta' mangghi kalakowan, ka"

'Bula ampon bungkol lè' ka'angghuy mangkat, ghella' sèyang bula ampon ajhanjiyan sareng kanca sè biyasa mamangkat orèng ka Malaysia"

"Manabi ampon bungkol, bula ta' bisa alanglang. Nangèng jha' kabhuru mangkat ka', bula ghi'ta'mare senneng apolong sareng dhika"

"Insyaa Alloh satengnga bulan agghi' lè bula sè mangkaddha", sangghemna Bardi sambi nèmmong binèna ka dalem romana, Misnati mèsem balibis sambi meddhem arassa ngabbher ka langngè' kapèng pètto'.

Ampon sabulan Bardi sè mangkat da' Malaysia, adhina sè binè'. Sakèng bannya'na kalakowan kantos kaloppaè se aberri'a kabhar ka sè binè'. Misnati bhingong, pèkkèranna posang. Dhinèng kerrong ampon ađuri komarong. Dhu'a terros eyonjhukaghi da' sè amorba alam, malar mandhar lakèna ta' nemmowa aral tor bhabhaja bađa è nagharana orèng. Bardi bhuru ènga' lajhu nélpon ka sè binè' asapora amargha bhuru aberri' kabhar. Misnati bhunga ta' kapra amargha kerrong sè aghumolong ampon katekka. odi'na sè kadhibi nyandhang kerrong ampon bađa tambhana.

Saterrossa, Misnati lancar narèma kèrèman dari lakèna. Misnati lajhu mokka' toko awal-jhuwal, sabatara kèrèman pagghun lancar dari Malaysia. Misnati samangkèn molaè segghut sar-pasaran

nyarè kanca malèbar bhangsa ka'angghuy lancarra usahana.

È kampongnga Misnati ampon dhaddhi orèng soghi anyar, kantos ejhulughi jhuraghan binè'. Salèrana atamba raddhin amargha segghut maca', adhandhan neng-sennengan. Rassa kerrong ka lakèna ghan sakonè' pon molaè tèpès èlang ghan nè'-sakonè', sè pađdhang ghun pèra' kérèman. Tokona ampon bađa sè ajaga, ta' ghung-tangghung, pangladhinna katello. Misnati ghun karè narèma ta' pot-rèpot alako.

Arè ahad baja lagghu Misnati katamoyan sapopona, Masda. Kađuwana pađa salang sambhellut nekkanè kerrong. Saellana samporna sè kerrong, Masda lajhu ngajhak Misnati lan-jhalanan.

"Maju bhuk mon èntara jar-karlènjar ka ghir sèrèng, pongpong arè ahad, ca'na Masda.

Ngèđing oca' ghir Sèrèng pèkkèranna Misnati ènga' nalèka ghi' parabanna toman tapangghi sareng orèng lakè' sè macellep ka atèna, terros satèya ghi' ènga'nga'. Misnati mèsem kadhibi'an sambi agharu obu'na sè ta' ghatel.

"Maju lè', abit ongghu sèngko' ta"lan-jhalanan, sèngko' lakar cè terrona sè war-kalowarra neng-sennengan maèlang lesso margha rèkong sareng dhaghangan malolo.

Kađuwana lajhu mangkat atèng-kentèng, nompa' sapèđa motor, tojjhuwanna ka sèttong kennengan wisata pasèsèr aliyas Pèngghir Sèrèng.

Pèngghir sèrèng baja lagghu ampon rammè. Pa'anabhan è sakobengnga èndha tor asrè. Tasé'na bhersè, ombo' bang-tabangan akadhi kapas abharis nambu karang lajhu abali ka tengnga saghara. Mano' dhalko' ngabbher aghalimpò, nambai sennengnga ka sè ngoladhi.

Sakèng dari leburra sè ngabasagli ghulina omba' ètambai angèn sè ngalessèr, Misnati dhala ta' ègharassa jha'molaè ghella, bađa orèng lakè' sè ngabassagli aba'na molaè dari konco'na obu'

kantos ka sokona.

“Mis...”, Misyati tapajaja' atolè ka sè ngolok, pèkkèranna lajhu ènga' ka sèttong orèng lakè nalèka ghi' asakola SMA. Abit kađuwana salèng pandheng.

“Ba'na Molyadi, ya”, sapana Misyati sè èjawab aonggu' mèsem.

“Abit ta' atemmo, ba'na ma' sajan raddhin”, Misyati mèsem, atèna bhunga sagħunong ana' aromassa aba'na ghi' ngođa.

Saterrossa kađuwana akandha nga'ngènġa'è carèta sè lamba' nalèka ghi' pađa asakola. Masda èsoro molè kađa', margħa Misnati ghi andi' kaparlowan laèn, toro'na neng pèkkèranna terro minta'a ater ka Molyadi.

Mamolan dari katemmowan è pèngghir sèrèng, kembhang-kembhang tarèsna ropana molaè maso' ka atèna Misnati sareng Molyadi. Kađuwana èkaloppaè jha' pon pada ala-bħala. Misnati sè abit ta' arassa'ghi sennengħha tarèsna tagħuđha lalakè' laèn sè bannè lakèna. Barija kċċa Molyadi kaloppaċ jha' pon andi' ana' ban binè. Kađuwana talanyo' norodhi nafso kantos cacana tatangħha ta' èkèđingagħi. Tatangħħana molaè rammè sè abħanta tēngħana Misyati sè molaè aoba. Bađa kċċa sè maċċa' nangèn ġħun acora' angèn lèbat, maso' dari kopèng kangħanna kalowar dari kopèng kacċerra. Kađuwana pon èlompa' napso kantos ta' ngħejabhi cacana orèng sè ampon cè' rammèna.

Carètana Misyati akħera èkèđing tor dapa' ka Bardi è Malaysia. Bardi ètélpon kancana margħħana ta' nyaman ngèđing rasanna tatangħħana bħab Misyati sè seggħut amontemmon sareng Molyadi orèng lakè' sè bannè lakèna.

Bardi aromassa panas atèna, darana ngalkal amargħa aba'na èyèna, kahormadħanna èdha'-tèddha'. “Carok”, maskè kanca ēlorok, mènangka jħallan kalowar nalèka bađa bhala sè asalèngka'.

Ta' mèkkèr li-baliyan Bardi lajhu marèngħes rang-bħarangħa. Ta' kaloppaè sekep sè aropa arè' èbhundhu' kalaban rambing potè. Tojjhuwanna ghun sèttong matèyanna Molyadi, orèng lakè sè nget-nengħet binèna.

Saellana dapa' ka Madhura, Bardi ta' lajhu maso' ka romana, nangèn jhujhuk da romana kancana nyaba' rang-bħarangħa. Saterrossa ta' aqantas abit lajhu makalowar arè'na ètongtong mangat alorogħha Molyadi.

Ètengħha parjhalan Bardi tapangnhi sareng Kè Sullam, ghuru ngajina.

“Bađa apa ma' ba'na ma' nèngtèng ghaghama, cong!” sapana ghuruna ka Bardi.

“Kaula matè'enna Molyadi. Kċċa” jawabbha Bardi

“Jariya arè'na ba'na ta' kċċa mèddhi' cong, mon kolè'na għi' ta' tegħħu, jha' san-ṅgasanè acarok”.

Kaula ampon bungkol kċċa, kala mennang nomer duwa”, sanggħem Anna Bardi

“Maju ka roma bi' sengko' ba'na èyessè'enna ghallu pas-dagħi' nyambi tang takabuwan”.

Bardi atoro' oca' dħabuna ghuruna, qalem atèna abhenderragħi ghuruna jha' lakar arèna ghun arè' biasa, tađa' èssena. Menorot carètana orèng Madhura, arè' ka'angħħuy acarok, bannè arè sarombanan, nangèn ampon èyessè'è ka sèttong ghuru, nyamana arè' takabuwan.

Dapa' ka dhalemma ghuruna pas-epatoju' ètanya'agħi carèta kadhaddhiyan sè pas matè'enna Molyadi. Bardi acarèta molaè dari se akabin kantos mangat da' Malaysia kalaban jħarna' tor na'na'. K Sullam ngonjhu' nyaba lajhu abu-dħabu.

“Sengko' ta' nyorowa ban ta' alangħla ba'na sè alorogħha Molyadi, tape sengko' ġħun maċċa' a ba'na”, dħabuna K Sullam.

“Ba'na jha' ġħun nyala'agħi orèng laèn, amargħa orèng ala-bħala bannè ġħun napaka lahèr sè

èbađanè, nangèng napaka bhatèn jhugha cè parlona. Mon ba'na pelka' è Malaysia, apa ghi' molèya ka Madhuraa. Binèna ghi ennom bhuto sakabbhina napaka lahèr ban bhatènna".

"Abdhina è Malaysia ta' aka-tèngka, nangèng è buđi pas ta' bisa ajaga kaparca'ja'an, mala aghabay salèngka" jawabba Bardi

"Mon ba'na lakar angko matè'anna otabana acarogha, saraddha bađa tello', mon ba'na sangghup, satèya kèya sèngko' ngèdhinè ba'na acarok", Bardi ta' ajawab ghun aonggu' adantos dhabu saterrossa dari ghuruna.

"Sè da' ada' mon acarogha, ba'na kodhu mennang. Mon ba'na kala ghun ollè tođussa, ba'na mate, anak' potona nyandhang tođus, mon ta' pojhur binè ban dhunnyana èkala' orèng laèn.

"Sè kapèng duwa', Mon ba'na mennang acarok, saterrossa kodhu mennang kèya ðalem parkarana. Mon ba'na kala ðalem parkara, bana bhakal èyokom, palèng sakejjha lèma bellas taon. Ba'na bađa ðalem okoman, mon tapalang binèna neng-sennengan ban orèng laen.

"Sè saterrossa, mon ba'na ghi' pagghun maksa sè acaroggha, ba'na sanat nangghung dhusana, asabab nyaba rèya andi'na ghustè pangèran, sala bhender sè tao ghun Ghustè Pangèran' Ba'na tođus èkoca' ta lakè' polana ta' acarok ghun ca'na orèng. Dhunnya rèya sakejjha', akhèrat mènangka odi' sè lanjhang. Dhunnya rèya ta' copè' cong, bannya' orèng binè' laèn sè lebbhi bhaghus. Mon lakar binèna ba'na ta' èsto, dhuli tellak ban ta' kodhu acarok. Mon ba'na sangghup kalaban tello' sarat jariya, satèya kèya pas mangkat, sèngko' ngèdhinè ba'na sè acarogha",

Bardi diyem ta' metto oca'. Lajhu jhagha manjheng nyèyom astana ghuruna nyo'on pamèt. Arè'na ètongtong sambi ajhalan masogha', nujju ka bengkona. Misyati takerjhat nèngalè Bardi temmo manjheng è labangnga romana nèngtèng arè', pojhur Molyadi pareppa'na ta' dateng.

"Ma' ta aberri' kabhar ba'na mon datengnga ka', oca'na sè binè' ngetter.

"Ba'na ma' tègha nyalèthong è bhuđina sèngko', sabatara è nagharana orèng, sèngko abhalangaja nyarè kasap.

"Saporana ka", bula ngakonè sala.

"Parèngkes rang-bharangnga pas lajhu kalowar dari tang romo rèya, pongpong sèngko' ghi ta' aoba nèyat. Kabala ka Molyadi, mon lakar lake' jha' ghun bangal ka tonđinga, mon ta' bangal ngabin jha' ngal-bangal nget-nengnget binèna orèng.

"karebbha dhika baramma ka"

"Ba'na bi' sèngko' ella ètellak tello, satèya kèya ba'na mole pas minta kabin ka Molyadi", Misnati tapajaja' èghem ta' metto sowara, aèng matana aghili.

"Parcoma ba'na nangès, sèngko' ta' kèra ngompa' copa sè ella èpakalowar. Sapa sè bangal amaèn apoy, kodhu sanat sè katonona". Oca'na Bardi sambi ngantolaghi plastèk aëssè pèssè.

"Jarèya balanjha ñibuđina dari sèngko", sambi ngèntep labang.

Misnati kalowar kalaban atè ancor, aèng matana aghili, kasta sakojhur bhadhan amargha aba'na aromasa sala. Rasa tođus tađa' engghanna nalèka tatangghana pađa ngabas acora' abangkangè dhibi'na'. Dhinèng Bardi lajhu maso' ngala' wudhu' lajhu asojut sokkor amargha èparèngè salamet kalowar dari pokpara tor ta' sampè' kadhaddhiyan carok\*

oooooooooooo



\*Carèta ka'đinto mènangka carèta fiksi, manabi bađa kadhaddhiyan sè pađa ka'đinto ghun kabhenderran bisaos.

## Cangkaro' Bâto

Angghidhân: Harwiyanto

Cangkaro' bâto saongghuna bânnè ta' èsto  
Sakèng la bâbâtek sè ta' èkennèng othek  
Atèna la ghâli mara bâto  
Aberri'â rassa èman  
Abâ' tako' ta' mèlo sè nyaman  
Abherri'â ka orèng sangghu jân taqâ'  
Sangghu jân ta' mendhâng  
Dâpor tako' ta' ngebbhul  
Èkakana tako' lapar  
Ana' poto tako' ta' mèlo  
Tapè apa sanyatana  
Paènga' ðhâbu Ghustè Pangèranna  
Ghustè Allah sè aghântèyana  
Abherri' sakonè' aghântè sabânnya'na  
Saongghuna sakabbhinna partèngkanna abâ'  
Bhâkal abâli ka abâ'  
Partèngkan beccè' abâli beccè'  
Partèngkan jhubâ' abâli jhubâ'  
Bhângo'an abâ' ènga'a  
Jhânjhina Ghustè Pangèranna  
Ta' kèra mèyal  
Maskè sakonco'na obu'na

Candhi, 16 Juli 2023



## Bhâko

Angghidhân: Harwiyanto

Ngaghâ' ngombâr mosèm nèmor  
Ngalessor angèn dâri tèmor  
Nyarepsep cellep ka tolang  
Masekken nèyat maca bismillah  
Alanđu' tana agahâbây buludhân  
Ka'angghuy kennenggan tampegghân  
Nakthak bighina bhâko nampek  
Èyarep tombu belta  
Sè ètamen ka cokkla'-cokkla' è buludhân  
Sè èpasanat.... èsaka'.... èlolos.... èpanterrè.... ècokkla'  
Èpanterrè è sabbhân lokkè'  
Èsèram sabbhân arè.... la'-ella' arè  
Èkeccèr la'-ella' arè  
Èyopènè èrao taker la'-ola'na èsarè  
Tongrap bunga èpetthèk  
Èsosol solang noro' èpetthèk èpaèlang  
Ècolè'.... èbhâcok.... ètèmbhuk....  
Taker buluna cèthak nghebbhuk  
Pangarep ollè rajhekkè sè nombhuk  
Bi-lebbina èkaèssè sobbhluk

Kolor, 17 Juli 2023

## *Sanja' Macemma Tatamennan*

Eserrat: Tarmidzi Ansory \*

### **Bhungkana Nyèyor**

Lambâyan ðâun meltas jhârna'  
Bhiruna ðâun masajân na'na'  
Angènna ngalessor matennang pèkkèran  
Èlang rowed lobâr kasossa'an

Bhungkana nyèyor panèka lakar tèngghi  
coma biyâsa ondung ta' gâgâ'  
Panèka ayèssè sango ðâ' abâ' dhibi'  
Sopajâ cettha' ta' aonga' adelnga'  
Asabâ bhungkana nyèyor ngaollè dhugghân  
Seddheng manossa biyâsa dhâddhi parembhâghân  
Jhâ' mapotè mata karo terro mennanga  
Bhângo' mowa nondu' kor dhâddhi saèna.

### **Somangka**

Bhiru bârnana macellep atè  
Mèra ðâlemma èpakon ngastètè  
Somangka cora' sajân massa'  
Sajân nyaman ka èber serra'

Ngabâssaghi ampon kobâssa  
Napa polè ngakan nyepsep ðâlemma  
Rassa manès sè cè' saèna  
Maèlang pegghel dhâddhi ta' arassa

### **Namen Pađi**

Sabbhân arèna karo noghuwi sabâ  
Sè dhâddhi tambhâna nyabâ  
Pađina ampon ngabhiru  
Mano' keddhî' sajân kabhuru  
Kabhuru terro ngakana  
Kađhâng matompes tađâ' karèna  
  
Pađi sajân nyorkep nondu'  
Mano'na sajân abhâludhu'  
Ca'èpon rèng kona pađi ampon towa  
Torè ngajhâk maghârsarè sakobhengnga  
Nyambi arè', pacol ngèrèng molonga

### **Jhâghung**

Arè ampon agellâ' ðâri tèmor  
Nyonar terrang cora' abit nèmor  
Tana mèra ampon tambhâ ngacerra  
Nyorkep mano' è bhungkana pao

Sabâtara rèng tanèna èntar abhersèyan  
Ka tegghâl sè dhâddhi kabherkaddhân  
Ca' èpon lagghu' ètamennana jhâghung  
Sopaja odi' andi' panangghung  
Asabâb ca' èpon tatamennan nèka  
Dâddhi parantara odi' mardhika  
Sampè' kantos bharnana è padâddhi mandirâ

## KÈJHUNG TARÈSNA

Jufriadi

Kèjhung tarèsna ka'qinto  
Meddhâl dâri atè sè ongghu èsto  
Nalèka raghâ ampon ta' kobâsa mandheng  
Salèrana dhika sè malolo ngonjhâng senneng

Kèjhung tarèsna ka'qinto  
Mènangka dhâddhi talaðhâ èsto  
Ka'ator dâ' dhika kembhângnga atè  
Dhâddhi palabbhuwân odi' kantos patè

Du' dhika sè malolo mèsem  
Cajâ salèrana aghundhek atè kasemsem  
Sokma kerrong sèyang bân malem  
Asareng dhika tarèsna bulâ tremtem

Nalèka dhika mapak tarèsna  
Ngembhân bhunga sè taðâ' engghânnâ  
Kabhughel sekken dâlem dâdâ  
Dhika dhâddhi bidhâddhâri sowarghâ

## NYANDHÂNG LARA

Jufriadi

Kerrongnga dhika ghun pèra' kanðhâ  
Nyatana adhina talka dâlem dâdâ  
Bibir manès lemma' taðâ' padâ  
Nyatana panas akadhi mardâ

Bulâ talanyo' oca'na dhika sè èndhâ  
Massra' aghi sokma mènangka talaðhâ  
Dâri tarèsnan atè sè naðhâ  
Ngarep dhika ajhulu èsto sè padâ

Mangkèn talè rassa aromasa talka  
Kadhibi' dâlem atè sè loka  
Ongghu bulâ ta' nyangka  
Jhânhina dhika mara apoy naraka

Èbhârat bhumè dâlem nèmor kara  
Atè kerréng taðâ' sè mèyara  
Kadhibi' odi' bulâ nyangsara  
Nyandhâng tarèsnana atè sè lara

Mekkassân, 2023

## MABÂR AÐURI KOMARONG

Jufriadi

Nalèka kerrong  
Ampon aghumolong  
Akadhi korong sè nangkorong  
È tengnga lorong  
Kerrong aðuri komarong  
Nancep dâ' dhika sèttong  
Arontong pon ta'kayètong  
Ajhâjhâr lajhir apolong

Nalèka petteng  
Atè mandhelleng  
Ngarep dhika qâteng  
Senneng ongghu senneng  
Nalèka sokma melleng  
Dhika mèsem dhâddhi bhâreng  
Sambi ngèjhung arengreng  
majhembhâr pèkkèr sè ñhengðheng

Du' dhika mabâr aðuri  
Tanang bulâ loka  
Nyapcap dârâ tarèsna  
Nyandâ' mèsemma dhika  
Mapak tarèsnana bulâ  
sè'ampom abit naðhâ  
Adântos mekkara sekkar mabâr  
Sè meddhâl dâri socana dhika



## Adrian Pawitra Tang Kancah Sè Palèng Kènthel

Sè nolès: Supik Tresna Art



Bhâbhâr dâri sèttong èbhu sè asmana Maisura (almh.) sareng sèttong rama sè asmana Muhammad Irsyad (alm.) è Bhângkalan tangghâl 20 Agustus 1969 èparèngè nyama Adrian Pawitra. Segghut ca-kanca salpa' èyolok Ian otabâ Mas Ian. Dâri bânnya'na c-akanca *seniman* sè biyâsa apol-kompol neng compo' dâri molaè kab-akkrabbhâ bân dreng-adrengnga ngodi'in komunitas Tèra' Bulân kongsè dâpa' ka ajâllâ Ian andi' bur-lèburân (*hobby*) sè bidhâ dâri cakanca laèn; arojhâk pettès.

Ta' toman loppa mon èntar ka tang româ Ian masthè mènta jhâk-rojhâghân. Maskè com wâ'-duwâ'ân so sèngko' sè arojhâk pagghu santa'. Dâri addhreng jârèya sala sèttong tand dâri Ian saèngghâ ta' getton mon Ian and bânnya' karya sè èhasèllaghi akadhi Kamâ Madhurâ Ghenna' Abhâsa Madhurâ – Indonesia sè èterbi'aghi sareng Dian Rakyat taon 200 kamos ka'dinto bânnya' nolès okara Madhurâ kabânnya'an' ta' èkaonèngè orèng Madhurâ dhît Bânnya' ta' èkaonèngè amarghâ okara ghel ampon para' èlangnga dâri kabiyâsa'an orè

bânnya' bi-lebbi orèng Madhurâ dhibi'. Pramèla dâri ka'dinto kamos ghellâ' cè' saèna bhâdhi andhâddhiyâghi masekken budhâyâ Madhurâ. Selaèn ngangghit kamos, Ian jhughân èkaonèngè dhâddhi *seniman* tor *budayawan*, abhuktè sareng angghidhânnèpon sè laèn ènggħi ka'dinto kompolan lagu-lagu Madhurâ, ngangghit carèta madhurâ, ngangghit nyanyiâñ madhurâ, aghâmbâr Ian jhughân pèlak. Dâri bânnya'na angghidhâñ ka'dinto Ian sampè' ekenal sareng bânnya' orèng, molaè dâri na'kana', toa ngodâ sadhâjâna kenal sareng Ian. Tèngka polana saè, sabbhâ, mora mèsem, loco, dhujhân aghâjâ'. Ka'dinto tandâ-tandâ Ian èkasennengèn orèng bânnya'.


Buwâ ghagħâr ta' jhâu dâri bungkana otabâ dâlem prèbhâsan Madhurâ "Olar kaber ta' abudu' olar sabâh" anđhâp asor prèbhâsan ka'dinto sè pantes èjhulukkagħi a dâ' Ian. Rèng seppo lake'na Muhammad Irsyad jhughân seniman, budayâwan Madhurâ sadhâjâ angghidhâñna èbârissagħi dâ' Ian. Engħi ka'dinto buku Ejaan Madura Tepat Ucap (2000), Naskah Kuno Pétotor Madhurâ tor Kamus Madhurâ Belanda sè terbit sebelum Indonesia Merdeka.

Taon 2009 bulân Pebruari tanggal 21, ongħu-ongħu dhâddhi bulân sè lakar èyarep āmargħâ Allah apareng jhudhu jhebbing dâri Kediri sè asmana Dwi Puspitasari. Samangken ampon aghâdhuvan pottra duwâ' sè theng-gântheng, sè wa'-towa'an asmana Putra Zavir Monterro, sè ngodâ'ān asmana Zavir Maraporteka. Molaè akabin Ian sareng raji tor pottrana alènggħi neng Sidoarjo, nangèng sabâkto-bâkto èkabhuto sareng

ca-kanca è Bângkalan tetep nomer sèttong ca'èpon Ian. Bân ta' toman loppa sabbhâñ ka Bhângkalan Ian mastè nyepper ka compo', tojjhuwânnna alola'a AROJHÂK PETtÈS. Sèttong bâkto Ian aserro sakè' kabbhi sambi matao robâ kasakè'an sè èbây-ghâbây sambi aghellâ'an, "palèng asam urat, kolesterol Ba". Ebâles so sèngko' sambi aghâjâ "Yan, mon la kè'-sakè'an dhuli mèd-amèdhâñ Ian", sambi aghellâ'an Ian pas ngoca' ka sèngko' "Bhunten Ba' kaulâ ta" bângal alangkae sampèyan" (nggak mbak saya gak berani mendahului sampean yang lebih tua) èjâwâb polè so sèngko' "ta' arapa Ian sèngko' ehlas bâ'na ka'adâ" (gak papa Ian saya ikhlas kamu duluan).

Cè' kastana aghâjâ' jhubet ghâllu bhuktèna Ian tangħħâl 17 Juli 2023 ampon èpondhut sareng Ghustè Allah è omor 54 taon. Ongħu ampon ngadâ'i bhâdhâñ kaulâ ka'angħuy ngadđħep Sè Amorbâ Jhâghât. Malarmogħâ sadhâjâ lalampa'anèpon dhâddhiyâ *amal jariyâ*. Raji sareng pottra-pottrana dhâddhiyâ orèng sè moljâ.





## A' BUSTOMI: SÈ ABHILLÂI BHÂSA MADHURÂ MARABHUT GHULÂBBHÂ APOY SÈ PAGGHUN REBBHÂNG

Puspa Ruriana  
Balai Bahasa Provinsi Jawa Timur

*Neng dâlem kaodi'ân è attas dhunnya sè sajân abit sajân èyangsek sareng majhuna tèknologi, ampon kappra segghut dhâddhi rosagghâ dâ' bhâsa daèra sè segghut ta' èyèmodhi orèng bânnya'. Namong ghi' bâdâ jhughân orèng sè ghi' dhâlâtén abhillâi Bhâsa Madhurâ sè ta' kobher aromasa lesso è dâlem araksa langghengnga bhâsa sareng sastra Madhurâ. Salèraèpon ngaghungè asma Pa' Bustomi kaonang ahli sennè sareng ahli bhuḍhâjâ dâri Sampang Jhâbâ Tèmor sè salanjhângnga kaođi'annèpon ta' pegghâ' pagghun abhâktè ka'angghuy mèyara sareng malanggheng sangkolan bhuḍhâjâ Madhurâ sè aghândhu' ajhi tengghi. Dâri dhâdhâbuwânnèpon sè bhângget somangat (inspiratif) kengèng èkaghâli jhâ' salèrana ampon anglèbâdhi parjhâlanan lowar biyasa. Salèrana pajhât pantes ajhâjhuluk "Pahlawan Bhuḍhâjâ" sè ngaghungè somangat sè kengèng ajhâghâi atè sè sengka sopajâ kengènga ajâgâ sareng malanggheng Bhâsa Madhurâ sè aghândhu' ajhi tengghi.*

**Sampang**-Neng dâlem cator sabellunnèpon Majallah Jokotolè ampon ngennallaghi "tokoh" dâri Songennep sareng dâri Bhângkalan. Neng terbi'ân samangkèn bhâkal ngennallaghiyâ "seniman sareng budayawan" dâri Sampang, Pa' Bustomi. Asma jhângkeppépon éngghi ka'dinto R. Tg. Jati Budoyo Bustomi Irwan Kurniadi, S.Pd.,M.Pd.,M.M.C.NS. Èbhâbhârrâghî neng Sampang tangghâl 18 Maret 1959. Salèrana samangkèn alèngghi neng Kampong Sembhung Dhisa Jhâtra Tèmor Kacamadhân Bânyowatès Kabhupatèn Sampang. È dâlem bhâb bhuḍhâjâ, samangkèn kabhubbhûwân amanat mènangka sè nyepowè Bidang Lingkungan Hidup dan Cagar Budaya Masyarakat Adat Nusantara (MATRA) DPW Jhâbâ Tèmor.

Sanaos pendidighânnèpon Sarjana (PKn) sareng Magister (PIPS sareng Manajemen), ta' dhâddhi alangan dâlem addhrengngèpon kaangghuy teptep tarèsna neng kasennèyan sareng nyerrat angghidhân. Dâ' Jokotolè salèrana aromasa kengèng paparèng ngaghungè katarèsnaan dâ' kasennèyan sè acem-macem sè dhâddhi panglépor atè, akadhi nyerrat angghidhân, maos buku, nyerrat ghâmbhâr, sareng amaèn drama. Kabit lancèng kana' ampon kaoladhân pajhât addhreng nyerrat angggidhân (tulis menulis). Neng taon 1978 toman mennang juwara 3 Nasional "Lomba Mengarang Katagori Remaja neng aëttong Majallah" sè terbi' è Jâkarta, sareng bânnya' kengèng piagam juara. Dâri tarèka ka'dinto saterrossépon kantos samangkèn teptep nyerrat bhâb sè akaè' sareng bhuḍhâjâ, bhâsa, sareng sâtra Madhurâ.

Sè dhâddhi panyabâb Pa' Bustomi trèsna abhillâi ka'angghuy malanggheng bhâsa sareng sastra Madhurâ kabit taon 1989-an amarghâ pangghâliyânnèpon aromasa bhâget ngennes ngoladhi bhâsa Madhurâ sè sajân abit sajân korang ègguna'aggi otabâ molaè édhingghâllagi sareng orèng Madhurâ dhibi'. Ampon bânnya' orèng Madhurâ aromasa langkong rajâ atè sareng

arinasa mantep manabi aghuna'agghi bhâsa Indonèsia sanaos paðâ orèng Madhurâna. Pramèla dâri ka'dinto Pa' Bustomi lajhu aromasa mantep jhughân ka'angghuy ngèrèng mèyara sareng malangggeng bhâsa sareng sastra Madhurâ. Ampon bânnya' tarèka sè ampon èlampa'aggi kantos samangkèn akadhi abhânto molang bhâsa Madhurâ neng pondhuk pasantrèn, neng kampus-kampus, neng sakola'an otabâ neng ormas-ormas, bacampo dhâddhi ellèt ghâlimpo' bhâsa Madhurâ, ghâlimpo' panganggit buku bhâsa Madhurâ ka'angghuy SD, aparèng diklat (narasumber) bhâsa Madhurâ abhânto Dinas Pendidikan, Dinas Kearsipan dan Perpustakaan Kabhupatèn Sampang. Toman ngarabui Kongrès Budaya Madura, jhuru dhabu neng seminar/dialog interaktif (tanya jâwâb) sè èbaðâ'aggi neng pondhuk pasantrèn, kampus-kampus, jhughân ormas-ormas. Salaèn dâri ka'dinto segghut jhughân dhâddhi jhuru dhabu (narasumber) neng zoom meeting bhâb bhâsa Madhurâ asareng Iowa University Amèrika Serikat, ngèssè'è lalampan kamadhurâ'n neng channel youtube sareng "Orasi Budaya Madura".

Pa' Bustomi ngèrèng acampo sareng acem-macem ghâlimpo' sè nalèktèghi bhâsa, sastra sareng bhuḍhâjâ Madhurâ kalabân kabhubbhûwân tarèka akadhi:

1. Seksi bidang bahasa neng Paguyuban Anðhâp Asor Sampang taon 2011 kantos samangkèn.
2. Sèksi bahasa neng Ghâlimpo' Dhu'remmek Pamekkasan taon 2018 kantos samangkèn.
3. Dèwan penasèhat Ghâlimpo' Madura Tempo Dulu (Sampang Tempo Dulu) Trunojoyo Sampang taon 2020 kantos samangkèn.
4. Nyepowè/katowa Ghâlimpo' Madura Saè taon 2021 kantos samangkèn.
5. Sè nyepowè/koordinator Lingkungan Hidup dan Cagar Budaya Masyarakat Adat Nusantara (MATRA) DPW Jhâbâ Tèmor.

Tojjhuwânnèpon Pa' Bustomi namong sèttong terro tekka'a hajhât mabâli polè sopajâ aghuna'aghi bhâsa Madhurâ sè saè tor sè lerres mongghu dâ' maghârsarè Madhurâ dhibi'. Rajâ pangarep sopajâ bhâsa Madhura ta' èlang mosna. È dâlem tarèka araksa Bhâsa Madhurâ salèrana ta' alolongan kadhibi'ân, marghâèpon bânnya' jhughân kèngèng bhântowan dâri para kanca "pegiat sosial", Dinas sè akaè' sareng bhuñhâjâ akadhi Dinas Kearsipan dan Perpustakaan, Dispora Budpar, sareng Dinas Pendidikan Kabupaten Sampang, sè ampon nyangghemmè saè kalabân bânnya' aparèng kasempadhân serrèng èpadhâddhi jhuru dâbu diklat otabâ ghâlimpo' ajhâr bhâsa sareng sastra Madhurâ.

Mènorot pamangghièpon Pa' Bustomi, saèstona Pamarènta Daerah ampon abhânto è dâlem tarèka malanggheng Bhâsa sareng Sastra Madhurâ, akadhi materbi' Pergub sareng Perbup bhâb Bhâsa Madhurâ neng sakola'an, aghuna'aghi bhâsa Madhurâ sabbhân arè Jum'at otabâ arè sè laèn neng tor- kantor sareng neng sakola'an, akadhi neng acara rasmè pamarènta'an nalèka ngèmodhi molang taon (ngaèmodhi Hari Jadi) Sampang neng bhân-sabbhân bulân Dèsember. Pamarènta Daerah segghut marabu salèrana ka'angghuy dhâddhi jhuru dâbu neng tarèka bhâb bhâsa Madhurâ. Namong mènorot pamangghièpon, bhântowan obâng **kèngèng kèngèng** sareng rarengghân (neng APBD) sanget sakonè', sanget ta'mendâng.

Nalèka Jokotolè mator pètanya, Kadhi ponapa pamangghièpon kamajhuwân bhâsa sareng Sastra Madhurâ jhâman sanangkèn, salèrana aparèng jâwâbhân: "Manabi ètèngalè dâri bânnya'na ngangoñâdhân sè bângal nolès karangan pajhât langkong bânnya' katèmbhâng jhâman ñhimèn. Bhuktè'èpon ampon bânnya' angghidhân sè èserrat ngangoñâdhân akadhi carpan, novel, puisi neng koran, majallah otabâ abujud buku. Namong manabi ètèngalè dâri carana aghuna'aghi pramasastrâ sareng carana

mèlè dâbuwân (diksi) Madhurâ ghi' jhâu dâri kasamporna'an. Rajâ pangarep moghâ ghi' bâdâ'â para seppo sè ghi' ghâtè abhânto aparèng pètodhu ka'angghuy masamporna'a.

Saka'dïnto jhughân bâkto aðhâbuwâghi jawabhân bhâb alangan sè dhâddhi dhâng-adhâng, èdhâbuwâghi jhâ' bhângget bânnya' alangan è dâlem mèyara sareng malanggheng bhâsa sareng sastra Madhurâ samangkèn, akadhi ampon bânnya' orèng Madhurâ bân sabâgiyân para seppo Madhurâ sè ngaghungè bâbenang neng pamarènta'an sè aghâdhuwân pangangghep jhâ' Bhâsa Bhâsa Madhurâ korang èkaparlo, korang kaonang (kurang komersial), ta' kennéng èpanyarè kaontongan arta (tidak bernilai ekonomis). Mala ghi' bâdâ sè ghâdhuwân pamangghi jhâ' Bhâsa Madhurâ ka'dïnto malarat èghuna'aghi (tidak praktis). Pamangghi sè korang sondhuk ka'dïnto sanget parlo kaangghuy èpabâli dâ' pandhuman sè salerressa.

Parlo bâdâna tarèka sè paðdhâng sareng sè ghâmpang èlampa'aghi ka'angghuy araksa langghengnga Bhâsa Madhurâ kantos jhâman sè bhâkal dâteng. Èdhâbuwâghi jhughân sareng Pa' Bustomi jhâ' bânnya' sabâb bhâsa sareng sastra daerah akadhi Bhâsa Madhurâ sè ampon segghut tasalèngka' kaangghuy majhu kalabân saè. Bânnya' panyabâb sè parlo èkaghâli. Sè kapèng sèttong, sakèng dâri serrèngnga "media sosial" sareng "média elektronik" nyèyarraghi " bahasa gaul " sè ampon èyangghep langkong ghâmpang èghuna'aghi (praktis) sareng èyangghep "lebih gaul", mongghu para goðâdhân (anak milenial). Sè kapèng duwâ', kakorangan buku pandhuman (referensi) akadhi cè' malaraddhâ sè mangghiyâ ku-buku bhâsa Madhurâ neng perpustaka'an é man-ka'dimman. Sè kapèng tello' molaè bâdâna kurikulum 1975 sè awajibbhâghi aghuna'aghi bhâsa Nasional (bhâsa Indonèsia) molaè kellas sèttong SD, molaè kellas mabâ. Hal ka'dïnto ropana pas dhâddhi sala sèttong panyabâb para orèng seppo langkong ngasokanè molang bhâsa

Indonèisia molaè pottrana onèng ngoca'. Akhèrrépon bhâsa Indonèisia èpadhâddhi bhâsa dhâsar sè palèng ngaðâ' (bahasa Ibu). Bit-abit bhâsa Madhurâ pas èsèngkèr sareng tasèllem. Macemma ampon bânnya' sala kappra bâdâ pamangghi, manabi molaé ghi' kènè' ampon pènter bhâsa Indonèisia èyangghep na'-kana' majhu tor pènter. Manabi ta' onèng bhâsa Indonèisia otabâ aghuna'aghi oca' Madhurâ èyangghep kadhingghâlân jhâman. Sè kapèng empa', bâdâna bâkto (alokasi waktu) sanget sakone'/sakejjhâ' kangghuy pangajhârân bhâsa Madhurâ sè namong 2 ejjhâm pangajhârân ( $2 \times 35$  mennèt). Ghuru sareng morèd paðâ malarat nambâi pangaonèngan bhâb lanjhâng lèbârrâ èlmo bhâsa Madhurâ. Sè kapèng lèma' korang saroju'na (kurang bersinergi) antara para sana' bhrâjâ, pamarènta, sareng maghârsarè kaangghuy maakor pamangghi malanggheng bhâsa Madhurâ sè sokkla sè samasthèna dhâddhi sangkolan moljâ bâgi ana' poto neng bingkèng aré. Anglèbâdhi ondhâggâ bhâsa Madhura aghândhu' maksod aparèng bâbulângan saè neng tatakrama sè andhâp asor.

Namong sanaos kabâdâ' ânna bhâsa Madhurâ andhâddhiyâghi sossa sareng bâringsangnga Pa' Bustomi, ma' pas bâdâ kabhâr sè majhembhâr pangghâliyânnèpon. Bâdâ sangghemman sè cè' ghâtèna (respon positif) sè dâteng dâri naghâra manca. Ropana tarèka abhillâi bhâsa sareng sastra Madhurâ anglèbâdhi media sosial kèngèng sangghemman (respon) dâri Guru Besar neng IOWA University Amèrika Serikat. Pa' Bustomi ampon serrèng èpadhâddhi jhuruðhâbu dâlem tarèka sè èseppowè Guru Besar ka'dinto anglèbâdhi zoom meeting. Sè palèng andhâddhiyâghi jhembhârrâ Pa' Bustomi tarèka ka'dinto bânnya' orèng sè apo-campo sè paðâ lèbur dâ' bhâsa sareng bhudhâjâ Madhurâ dâri bânnya' naghârâ manca.

Akaè' sareng tarèka malanggheng bhâsa sareng sastra Madhurâ kaangghuy bâkto sè bhâkal

dâteng, salèrana ngaghungè pamangghi sè kodhu èghâtèyaghi sopajâ tarèka moljâ ka'dinto bisa lancar. Sè kapèng settong, pamarènta Daerah bisa'a aparèng bhântowan (anggaran) sareng rarengghân (fasilitas), kaangghuy malanggheng bhâsa sareng sastra Madhurâ, akadhi mokka' "Jurusan" bhâsa sareng sastra Madhurâ neng kampus kaangghuy molang calon ghuru sakola'an. Sè kapèng duwâ', manaddhek ghedhung perpustakaan bhâsa Madhurâ. Sè kapèng tello', makopol para pakar bhâsa Madhurâ kaangghuy molang dhâddhi dosèn j h u g h â n k a a n g g h u y m a t a r t è b p o l è (merekonstruksi) éjhâ'an neng ku-buku bhâsa Madhurâ. Sè kapèng empa', aparèng tandhâ pangèsto dâ' para seppo sè ampon abhillâi mèyara sareng malanggheng bhâsa Madhurâ. Sè kapèng lèma' mabânnya' abhâdhi buku bâca'an, majallah, koran, bulettin, kontèn medsos sè aghuna'aghi bhâsa Madhurâ sè bisa èparèngngagghi dâ' sakola'an, ponpès, ormas sareng maghârsarè. Sè kapèng ennem, pamarènta èyarep bisa aghuna'aghi tolèsan bhâsa Madhurâ neng paanabhân sareng longabhânna orèng bânnya' (tempat umum) akadhi neng kantor, termènal, sakola'an, pasar, roma, sakè', jhâlân rajâ, masjid, ssl. Artèèpon salaèn èserrat sareng bhâsa Indonèisia jhângkep sareng serradhân bhâsa Madhurâna.

Saabiddhâ trèsna abhillâi bhâsa, sareng sastra Madhurâ, sanget bânnya' tandhâ pangèsto (penghargaan) sè ampon èkapondhî Pa' Bustomi, antara laèn akadhi:

1. Budayawan Seni Mendongèng dâri Bupati Sampang taon 2017.
2. Anugerah Gelar Rađén Tumenggung Jati Budoyo dâri Kraton Magkualaman Jogjakarta neng bulân Dèsember 2022.
3. Instruktur bahasa Madura taon 2022-2023 dâri Dinas Kearsipan dan Perpustakaan Kabupaten Sampang.

- Langkong dâri 25 macem piagam dâri Disdik, kampus, ormas, ponpes, tanđhâ pangèsto jhuruđhâbu (narasumber) bhâsa, sastra, adhât, bhuđhâjâ Madhurâ.

Nalèka Jokotolè mator pètanya bhâb samangattèpon Pa' Bustomi sè pagghun koko ta' nyorot sanaos satèndhâk trèsna abhillâi bhâsa sareng sastra Madhurâ, ropana salèrana ngaghungè cara amacem bârna otamaèpon è dâlem ngađhebbhi bâđâna kamajhuwân tèknologi sè serrèng dhâddhi panyabâb bhâsa daerah akadhi bhâsa Madhurâ sè tasèngkèr, èkabâlunnaghi. Caraèpon anglèbâdhi tarèka akadhi ka'đinto:

- Serrèng otabâ abiýâsa'ghi aghuna'aghi bhâsa Madhurâ sè aogher dâ' onđhâghân bhâsa neng parèntèng lampa, đhâđhâbuwân (sambutan) neng sabbhân pasèmowan.
- Nyerrat agghidhân sè aghuna'aghi bhâsa Madhurâ otabâ abhânto tarjâmah.
- Serrèng ngèrèng addhuwân sè akaè' sareng bhâsa Madhurâ akadhi puisi, drama, palegghirân, ssl.
- Serrèng ngèrèng seminar bhâsa, adhât, sareng bhuđhâjâ Madhurâ.
- Acampo neng bânnya' ellèt ghâlimpo' sè mertè /malanggheng bhâsa sareng bhuđhâjâ Madhurâ.
- Serrèng nyombhâng angghidhân (artikel) neng Majallah Jokotolè.
- Abiyâsa'ghi aghuna'aghi onđhâggâ bhâsa neng sana' bhrâjâèpon akadi dâ' pottra-pottrèèpon, panakan, bâjâèpon, jhughân dâ' maghârsaré neng sakobhengnga.

Bâđâ pamanggièpon sè aropa pokeddhân sè bhânget bhidhâ sareng pamangghina orèng laèn. Salèrana ađhâbuwâghi jhâ' bhintèng palèng akhèr sè palèng kowat araksa bâđâna/langghengngèpon

bhâsa sareng sastra Madhurâ karè neng pondhuk pasantrèn. Hal ka' đinto ampon abit romasana ta' kobher èkarèna sareng èkaonèngè orèng bânnya'. Mènorot pamangghina, kantos samangkèn para sana' bhârâjâ olama'/kèyaè/bhindhârâ/ustadz ghi' pagghun bânnya' aghuna'aghi onđhâggâ bhâsa Madhurâ kalabân saè. Saka'đinto jhughân para santrè otabâ alumni otamaèpon dâlem pasèmowan. Nalèka molang këtab, pangajhiyân, kantos serradân neng këtab konèng tarjâmah sareng jhâjhârbânnèpon sadhâjâna ghi' koko aghuna'aghi bhâsa Madhurâ.

Manabi è dâlem karèna'ân malanggheng, majhurbhu bhâsa sareng sastra Madhurâ sè bhâkal èlampa'aghiyâ neng bâkto sè bhâkal đâteng, Pa' Bustomi ngaghungè tambâ'ân cara akor sareng kamajhuwân jhâman. Hal ka'đinto aghândhu' maksod sareng tojjhuwân ka'angghuy malanjhâng lèbâr pa'anabhân anglèbâdhi "média massa sareng mèdia sosial", mabânnya' ngangghit buku bhâb bhâsa sastra Madhurâ, mabânnya' acampo sareng para tokoh sè pajhât ghumatè mèyara bhâsa sareng sastra Madhurâ, jhughân karèna'an abađâ'aghi pamèran otabâ addhuwân sè akaè' sareng bhâsa sareng sastra Madhurâ.

Sanget parjhughâ jhughân bâkto para kanca dâri Jokorolè mator pètanya, "Sampè' bilâèpon Pa' Bustomi sanat abhillâi langghengngèpon bhâsa sareng sastra Madhurâ?" Pa' Bustomi ajâwâb klabân đhâđhâbuwan bhâkal terrosa trèsna abhillâi bhâsa sareng sastra Madhurâ kantos ta' kowat polè apangghâliyân, ta' kowat polè ngangka' rarengghân ka'angghuy nyerrat. Sanaos ampon pangsiyun dâri abhâktè dhâddhi pongghâbâ (lastarè ađines abiddhâ 41 taon) tapè sajân bhârenteng ngèrèng lampa malanggheng bhâsa sareng sastra Madhurâ.

Angghidhân buku sè lastarè sareng ghi' "proses," prappa'na èpatotok, akadhi:

- Menyelamatkan bahasa Madura dari

kepunahan, juwara 2 sa Madhurâ taon 2008.

2. Lemma' Manès (kèrata bhâsa Madhurâ).
3. Paparèghân sareng Pantun Madhurâ.
4. Kamos Kèyasan Madhurâ (ghi' èpatotok).

Salaèn dâri bhâb bhâsa sareng Sastra Madhurâ, ropana Pa' Bustomi serrèng jhughân ngèrèng lampa sè dhâddhi panyabâb bânnya' kengeng tanđhâ pangabhâktè sareng piagam tanđhâ kamennangan, akadhi:

1. Pelopor Karya Ilmiah Tingkat Nasional LIPI Jakarta (taon 2005 sareng 2006)
2. Pelatih Seni Lukis Nasional (taon 2005, 2006, sareng 2007)
3. Pembimbing Seni Lukis Pelajar Nasional (taon 2008)
4. Kepala Sekolah Dasar Teladan (juwara 2) sa kabupatèn Sampang (2013)

5. Ahli Cagar Budaya Pratama dâri Dirèktur Jèndral Kebudayaan Kemenđikbud Jakarta (taon 2022)
6. Ketua Tim Perumus Baju Adat Sampang (taon 2022)
7. Anugerah Negosiator Profesional (taon 2023)

Ghi' sanget bânnya' tandhâ/piagam sè ta' sempat kaserrat akadhi neng bhâb drama, patung, puisi, dhungngèng, ghâmbhâr sareng sè laèn.

Neng ator pongkasan Jokotole, Pa' Bustomi bânnya' nètèp rajâ pangarep mongghu dâ' para ngođâdhân sè akae' sareng tarèka malanggheng bhâsa sareng sastra Madhurâ kaangghuy bâkto sè bhâkal dâteng sopajâ bânnya' apo-campo ngèrèng matartèb pole (rekonstruksi /revitalisasi) bhâsa & sastra Madhurâ sè saè sareng sè lerres ka'angghuy nerrossaggi bhârisân bhuđhâjâ dâri bângaseppo kabit ñhimèn.



## BALAI BAHASA PROVINSI JAWA TIMUR NYOMBHANG 210 MACEM DHABUWAN BHASA MADHURA KAANGGHUY MANGOLBU' AJHINA BHASA INDONÈSIA SÈ SAJAN AMANCA BARNA SARENG PARJHUGHA

Puspa Ruriana (Balai Bahasa Jawa Timur)



Nalèka macemma dhadhabuwan neng bhasa Indonèsia ampon sajan atamba bannya', Balai Bahasa Provinsi Jawa Timur (BBPJT) ta' kadhingghalan jhugha ngatorraghi sombhangan anglèbadhi sèttong lalampan sanaos saèstona ta'ghampang. BBPJT ampon ngalampa'aghi tarèka bannè sakadhar mabannya'a macemma dhabuwan neng KBBI bisaos, namong jhughan bhakal apareng sombhangan ka'angghuy makoko sareng nambai soghina bhasa Madhura neng Naghara Indonèsia. Dari 600 bannya'na dhabuwan bhasa Jhaba sareng bhasa Madhura sè èyatorraghi sareng BBPJT, korang langkong 210 bannya'na dhabuwan bhasa Madhura samangkèn ampon rasmè maso' ka KBBI. Mènangka sèttong tarèka molja sanaos kadhiya èyangghep kéné', namong sanget apaghuna ka'angghuy masamporna macemma dhabuwan sè majhurbhu bhasa Indonèsia sè sajan abhabbhar kalembangnga ka manca naghara.

Sorbhaja, 8 Agustus 2023 Balai Bahasa Provinsi Jawa Timur anglèbadhi KKLP Perkamusan dan Peristilahan (KKLP KI) ampon malastarè Sidang Komisi Bahasa Daerah (SKBD) leres tanghal 3 kantos tanghal 7 Juli 2023. Tojjuwan tarèka ka'dinto ka'angghuy nalèktèghi akorrèpon sareng ogherran (*validasi*) 600 macem dhabuwan bhasa daèra neng Jhaba Tèmor sè èyatorraghi ka'angghuy epamaso' ka dalem Kamus Besar Bahasa Indonèsia (KBBI). Dari jumlah ka'dinto 535 dhabuwan sè èyatorraghi ampon akor sareng syarat/ogherrèpon ka'angghuy epamaso' da' KBBI, kalaban birjhi'an 210 dhabuwan Bhasa Madhura, jhughan 325 dhabuwan dari bhasa Jhaba. KBBI mènangka rèngkessan dari Kamus Besar Bahasa Indonèsia. Dhabuwan sè bada neng KBBI sajan èpasamporna èpaakor sareng kamajhuwan jhaman kaodi'anna magharsarè naghara Indonèsia. Sakadhar salèng maémot, sajan

masamporna bhasa sè èghuna'aghi sèttong bhangsa sabab dhaddhi sala sèttongnga kaca kebbhang kamajhuwnnèpon magharsarè, sè paddhang kaoladhan nalèka sajan amanca barnana dadhabuwannèpon.

KBBI neng terbi'an sè palèng awwal bada 62.000 macemma dhabuwan ban samangkèn ampon aëssè 120.000 dhabuwan. Sajan bannya'na dhabuwan neng KBBI meddhali dari bannya'na sombher, akadhi bhasa manca, bhasa daèra, sareng bhasa Indonèisia. Masoghi amancabarnana dhabuwan neng Bhasa Indonèisia èlampa'aghi kalaban tojjuwan molja maonggha dharajhat kasangghubhan ka'angghuy majharna' dhabuwan sè aghandhu' acem-macem maksod neng bhasa Indonèisia. Sala sèttongnga cara ka'angghuy jhujhuk da' tojjuwan kasebbhut, èngghi ka'dinto bisa mondhut dari bhasa daèra sè bisa kalampa kalaban nyarèng cem-macemma dhabuwan sèamancabarna sè sondhuk sareng ogherra kamos. Lalampa ka'dinto mènangka bagiyan dari tarèka masoghi barna sareng macemma kosakata bhasa Indonèisia.

Bada pan-saponapan tarèka sè kodhu èlampa'aghi sabellunna sèttong dhabuwan bisa èkasaroju' maso' da' KBBI, èngghi ka'dinto:

1. Nyarè sareng nyèmpen serradhan/rekkaman macemma dhabuwan bhasa daèra (*Inventarisasi kosakata bahasa daerah*).
2. Mabadai pasèmowan kosakata areng latèyan ka'angghuy nalèktèghi sareng ajharba'aghi bhab bhasa daèra (*Lokakarya Bahasa Daerah*).
3. Papangghiyan ellèt ghalimpo' bhasa daèra (*Sidang komisi bahasa daerah*).

## *Inventarisasi Kosakata Bahasa Daerah Jawa Timur*

Nyarè sareng nyèmpen serradhan otaba rekkanan macemma dhabuwan mènangka tarèka sè palèng awwal sè kodhu èlampa'aghi ka'angghuy ngatorraghi (ngosollaghi) sopaja cem-macemma dhabuwan bhasa daèra neng Jhaba Tèmor bisa èpamaso' da' KBBI. Tarèka ka'dinto èlampa'aghi kalaban aghuna'aghi cara ngompollaghi/mapolong cem-macemna dhabuwan dari bhasa daèra sè bada neng Jhaba Tèmor. Neng taon 2023, nalèka mapolong cem-macemna bhasa daèra aengghun neng duwa' kennengangan, neng Kabupatèn

Pamekkasan sareng Kabupatèn Jombang.

### 1. Kabupatèn Pamekkasan

Macemma dhabuwan sè bisa èkompollaghi neng Kabupatèn Pamekkasan mènangka bhasa Madhura. Dhabuwan sè èpangghi aropa'aghi dhadhabuwan sè akaè' sareng tasè', kasennèyan, teddha'an, carana abhadhi buja, sareng dhadhabuwan laènna.

### 2. Kabupatèn Jombang

Macemma dhadhabuwan sè bisa èpapolong neng Kabupatèn Jombang mènangka macemma dhabuwan bhasa Jhaba. Ompamaèpon dhabuwan sè akaè' sareng kasennèyan, bhab orèng tanè, sareng bhab santré sareng dhabuwan laènnèpon.

Tarèka mapolong cem-macemma dhabuwan bhasa daèra ka'dinto ampon kalampa neng è bulan Maret 2023. Sadhajana ampon anglèbadhi lalampa neng duwa' kennengangan ampon bisa mapolong 650 dhabuwan sè èyangggep bisa nambai sampornana dhabuwan neng bhasa Indonèisia. Parlo èkaghali jha' è dalem mapolong macemma dhabuwan bhasa daèra, ta' sadhajana dhabuwan sè èpangghi bisa èyosollaghi ka'angghuy èpamaso' da' KBBI. Bannya' syarat sè kodhu dhaddhi ogher nyoppè bisa'a ètarèma neng bhasa Indonèisia. Salaèn dari ka'dinto sopaja bhasa Indonèisia pagghun aghandhu' sèpat sè jhekjhek konglangkong neng bhab bhangonna dhadhabuwan dari ogher morfologis.

### Lèma' syarat kasebbhut sè kodhu èkaghali akadhi ka'dinto.

a. Tada' tongghalla, bhidha sareng sè kappra (*unik*)  
Dhabuwan sè èyosollaghi kodhu aghandhu' artè sè ghi' tada' rancanganna neng bhasa Indonèisia ghunaèpon ka'angghuy notobhi sè rongghang (kosong) bhab artè neng bhasa Indonèisia. Akadhi conto:

*rajhang n Mdr* pakakas bessè sè neng bagiyan konco' babana pèppè' abak tajhem èghuna'aghi ka'angghuy ngalè tana; manabi sareng orèng majang èghuna'aghi ngalè beddhi nalèka aèng tasè' asat akadhi ngala' lorjhu'. Dhabuwan rajhang ètolak marghaèpon ampon bida rancangan sè pada neng KBBI sè

kaserrat *linggis*.

b. Salpa' manabi èpèrengngaghi (*Eufonik*)

Dhabuwan sè èyosollaghi ta' aghandhu' sowara sè ta' kappra/korang parjuga è dalem bhasa Indonèsia tapè kodhu akor sareng ogherra monyè (*fonologi*). Syarat pandhuman sè èkamaksod sopaja dhabuwan ka'dinto ghampang dalem keccabbha lèsan sareng orèng sè adhabuwaghi jughan akor sareng macemma bhasa daèra, contona aksara panotèng /g/ è dalem bhasa Betawi/Sondha/Jhaba lajhu èyoba dhaddhi /k/ è dalem bhasa Indonèsia. Akadhi:

a. Ojeg > ojek

b. Gubug > gubuk

c. Akor sareng ogherra pramastra bhasa Indonèsia (*Seturut Kaidah bahasa Indonesia*)

Dhadhabuwan ka'dinto bisa èbhongan sareng abujuddhaghi dhabuwan laèn kalaban aghuna'aghi ogher abhangon dhabuwan bhasa Indonèsia akadhi èmbuwani sareng dhabuwancamporan (oca' rangkep akadhi oca' saroja). È dalem bhasa Madhura serrèng èpangghi sowara rangkep. *pejha* èserrep dhaddhi

*peja n Mdr* mènangka macemma jhamona orèng binè' magharsarè Madhura kaangghuy madherres aèng bhajem (ASI) sè aghuna'aghi daun bluntas, koddhu' ngoda, jhai, konyè', temmo labak, sareng sènnam.

d. Ta' aghandhu' maksod parsemmon sè ta' saè (*tidak berkonotasi negatif*)

Dhadhabuwan sè aghandhu' maksod jhuba' ta' parlo èghuna'aghi marghaèpon kobatèr ta' bhakal ètarèma monghu da' ghalimpo' sè aghuna'aggi bhasa alos tèngghi. Pramèla dari ka'dinto manabi bada dhadhabuwan sè aghandhu' artè sè pada sè ghi' tada' neng bhasa Indonèsia, mèla ka'dinto sè èkasaroju' èyèdhinè maso' da' KBBI mastè dhadhabuwan sè aghandhu' maksod sè langkong saè. Akadhi dhabuwan *lokalisasi* sareng pelokalan aghandhu' artè sè pada, namong *pelokalan* langkong èkasaroju' èyèdhinè èpamaso' marghaèpon aghandhu' maksod sè dhabuwan sè èkasandhing bhan-sabbhan dhabuwan.

e. Serrèng èghuna'aghi (*sering digunakan*)

Serrèngga aghuna'aghi sèttong dhabuwan bisa

èyokor dari bannya'na orèng sè aghuna'aghi sabbhan bakto (*frekuensi*) sareng engghun sakobhengnga (*range, Bhs.* Inggris) serradhan sareng bhasa tolèsan dalem kaodi'an rè-sa'arèna (*korpus*). *Julat* mènangka barattana sareng ombarra dhabuwan kasebbhut neng bhan-sabbhan kennengangan. Sèttong dhabuwan èyangghep serrèng èghuna'aghi manabi " frekuensi" ombarra sanget serrèng (segghuddha) jhughan neng kennengangan orèng sè adhabuwaghi sanget baratta. Contowèpon saka'dinto: bonek n mènangka jhajhulughan ka'angghuy ghalimpo' (*klub*) orèng sè lèbur nèngalè orèng addhuwan amaèn ebbal Persebaya Sorbhaja dari Jhaba Tèmor. Dhabuwan *bonèk* kala sareng dhabuwan *bobotoh* sè baratta èghuna'aghi neng tha-kottha laèn è tana Jhaba, Sumatra, Sulawesi sè jhughan serrèng aghuna'aghi. Ka'angghuy ngaghali serrèngga ombarra dhabuwan bisa èyoladhi anglèbadhi *google trends* sareng *google search*.

## Lokakarya Bahasa Daerah Jawa Timur

Pasèmowan ka'angghuy mangghi cara malastarè bharang sè moskèl bhasa daèra neng Jhaba Tèmor mènangka tarèka sè kapèng duwa' sa'amponna mapolong dhadhabuwan bhasa daèra. Neng lalampa ka'dinto pada marèksa sadhaja serradhan/cathedddhan ka'angghuy ngaonèngè lerres bhuntenna "data" sè èkaollè anglèbadhi catheddhan macemma dhabuwan bhasa daèra sè tapongkor. Verifikasi aghandhu' maksod ka'angghuy ngaollè jhajharba'an sè lerres sè akor sareng sè bada neng kennengngan panalèktèghan. Lalampa ka'dinto èpajhangkep tor èpasamporna kalaban marabu para jhuru dhabhu (*narasumber*) sè pajhat pènal ka'ahliyanna. Verifikasi ampon kalampan neng akhèr Mèi 2023 anglèbadhi *Lokakarya Hasil Inventarisasi Kosakata Bahasa Daerah di Jawa Timur*. Neng dalem lampa ka'dinto ampon marèksa lerres bhuntenna 600 dhabuwan akor sareng kabada'an sè samastèna.

## Sidang Komisi Bahasa Daerah (SKBD)

Lalampa palèng bingkèng ka'angghuy majhurbhu macemma dhabuwan bhasa Indonèsia, Balai Bahasa Jawa Timur mabada *Sidang Komisi Bahasa Daerah (SKBD)*. È dalem ondhaghan lampa kadinto marèksa

sareng ma'akor lerres bhuntenna badana dhabuwan dari hasèlla lokakarya sè ampon kalampa sabellunna. SKBD kalampa kalaban marabu duwa' jhuru dhabu (*narasumber*) dari Pusat Pengembangan dan Pelindungan Bahasa, Badan Pengembangan dan Pembinaan Bahasa. Duwa' jhuru dhabu ka'dinto mènangka *editor* sareng *redaktur KBBI*. Validasi èlampa'aghi kalaban cara marèksa polè cemmacacemma parkara akadhi:

1. Marèksa polè osolan dhabuwan, ponapa ampon cokop jhangkebbha bhab dhabuwan sè èpamaso', akadhi carana alafallaghi, mesa keccap, sareng ghalimpo'na dhabuwan.
2. Marèksa polè osolan dhabuwan, ponapa ampon bada rancanganna neng KBBI.
3. Marèksa polè osolan dhabuwan, ponapa ampon bada rancanganna neng bhasa sè laèn.
4. Marèksa polè carana ajharba'aghi maksod/artè dhabuwan sè ampon èyosollaghi.

Dari hasèl SKBD, ènyata'aghi jha' 535 dhabuwan ampon ampon cokop syarat ka'angghuy èmaso'aghi ka dalem KBBI kalaban birjhi'an 210 dhabuwan bhasa Madhura sareng 325 dhabuwan bhasa Jhaba. Dhadhabuwan bhasa Madhura sè ènyata'aghi bisa èpamaso'ka dalem KBBI:

*danggak* (dangga' n Mdr) kasennèyan sè coma bada neng Madhura aropa'aghi tangdhong sareng kèjhung sè ta' mabi èyèrèngè tabbhuwan, biyasana nyarèta'aghi bhunga sareng sossana orèng alako majang.

Dhabuwan dhingga' è dalem kérata bhasa bhasa Madhura aghandhu' maksod : sè atangdhong gaga'.

*selá* (sellá n Mdr) nase' sè èbhadhi dari bherras sè bisa ècampor sareng tenggang, tèla, otaba jhaghung.

*minian* (mènèyan n Mdr) mènangka tambha' otoba pèta' kaangghuy abhadhi buja okoran 70 m x 30m.

*wakap* (wakap n Mdr) asallèpon dari bhasa Arab, waqaf) mènangka kennengnganna orèng abhajang sè okoranna langkong raja dari langghar (mushalla) tapè langkong kènè' ètèmbhang masjid.

*kobhung* (kobhung n Mdr) langghar okoran kènè' aengghun neng mongghing bara'na tanèyan lanjhong mènangka kennengnganna ébada akadhi shalat, ngajhi sareng kennengnganna sana' bhraya apol-kompol.

*konor* (konor n Mdr) kabada' anna kolè', jhila, tanang sareng bhadhan laènna sè kandhel otoba ghalarsat amargha kennèng panas.

*lamon* (lamon n Mdr) rambing sè èpentè akadhi tampar sè èsolet kaangghuy ngaggha rengngé'.

Tarèka mabannya' macemma dhabuwan neng KBBI bisa jhugha èlampa'aghi magharsarè anglèbadhi osolan ka'angghuy èmaso'aghi da' "aplikasi KBBI daring". Cara ngosollaghi dhabuwan anglèbadhi "KBBI daring", kalaban aghuna'aghi cara akadhi ka'dinto:

1. È y a t o r è b u k k a ' k a c a (laman)  
[kbbi.kemdikbud.go.id](http://kbbi.kemdikbud.go.id).
2. Maso' mènangka sè aghuna'aghi (nyo'on édhi dhaddhi ellèt anyar (*daftar baru*) kalaban mamasok alamat ponsel.
3. Èyatorè serrat sè bhakal èpamaso'a (entri) kaangghuy èyosollaghi. Manabi "entri" ghi' tada' sè ngosollaghi, lalampa bisa èpaterros.
4. Èyatorè pamaso' sadhaja syarat kantos jhangkep sambi ngantos verifikasi sareng validasi dari ghalimpo'rèdaksi.



## KUWÈ TATABHUN

Lilik Hasanah\*



**S**amangkèn bâdhân kaulâ jhughân terro  
aparèng onènga kuwè otabâ Kuwèan  
Madhurâ laènna sè sami saè rassana, tor  
biyâsa bâdâ è sar-pasar jhuwâlanna. Kuwè

tatabhun nyamana panèka sala' sèttong kuwè sè  
bentu'na tong duwâ' sareng Lempok kantos  
potonganña misamiya coma karo bhidhâ bahan  
èpon. Kuwè panèka lebbi kalontha ètèmbhâng

Kuwè Lempok sè maskè bâdâ jhuwâlânnna namong ampon abâk rang-rang. Polana antarana Jhâjhân Lempok bân Tatabhun para' padâ'â. Mangkana kaulâ abhâbhâraghi jhughân jhâjhân panèka sopajâ sajân jellas tako' mi' è kabupatèn, kacamadhân, dhisa tor laènna sèttong nyama, bentu' tor rassana. Dhâddhi dâggî' pola pas nambâ pangaonèngan dâ' Jhâjhânna sè aropa jhâjhân kainto. Bahan èon manabi terro abhâdhiya jhâjhân Tatabbhun èngghi panèka sè kodhu wâjib èsiyap'aghi bâdâna antara èpon; arta', dâun pandân, teppong bherrâs, ghulâ mèra, bujâ, teppong kanji, aèng, parottha nyèor ghâbây taburan. Carana aghâbây èpon awalla arta'/kacang ijo parèngè aèng ma'lè ro'om berri' dâun pandân teros è massa' ghuduk bâddhâi sobbhluk panas'aghi ka *gas elpiji* otabâ tomang, dâggî' manabi ampon massa' alias kacang ghella' abâk lembu' pas kala' ngangghuy cèntong allè ka bâddhâ atom pas èghâluy ghâallu sampè' alos samarèna panèka pas campor'aghi teppong bherras bân kanjina, bujâ, ghulaâ mèra pas parengè nyèor sè èparot tor lastarè è andhel ka panci otabâ sobbhluk saghitaran sapolo menidhân pas angka'. Manabi ampon ranta pas allè ka loyang masèghi empa' rajâ kènè'na ngakoraghi kalabân bânnya'na bahanna sè è ola. Sabellunna èallè jhâ' kaloppaè loyanga parèngè mènnya nyèor para' padâ'â sareng aghâbây jhâjhân lempok tojjhuwân maklè tak' nyaker dhing èkala'. Dâggî' mon pon marè èsabâ' ka atom pas *Kukus satengnga* mennidhân. Mon ampon lastarè massa' abârna abâk coklat dhuli bâta', pas rès-èrrès angghuy tođik bentu' kasokanna empèyan. Jhâ' pon èbhentu'è bâjhik' masègghi empa' tor laènna keng sè kapra è bentu' bâjhik akadhi kartu sè bâdâ è domino. Dâggî' pas

èattassa taburin nyèor mon terro sajân nyaman saè parèngèn *topping* sè laèn pađâna coklat, vanilla bân laènna. Saka'dinto pangaonèngga kaulâ ngennèng jhâjhân lempok bân tatabhun panèka dâ'pađâ'â bentu'na coma sè malaèn namong bahan otamana. Manabi jhâjhân lempok ngangghuy jumbeng manabi jhâjhân tatabhun bahan otama èpon ngangghuy arta' sè ècamporè sareng teppong bherrâs bân kanji. Pangarep dâri bâdâhân kaulâ manabi bâdâ pamangghi sala nyo'on sapora, tor sopajâ tolèsan panèka amanfaat dhâddhi bâ-tambâ pangaonèngan sajân bhunga manabi dâggî' asabâb serraddhân panèka pas maghârsarè bâdâ sè kasokan aghâbâyâ ka'angghuy è jhuwâllâ.

*Duwa' Foto panèka è pondhut dâri Google.*



## KUWÈ LEMPOK



**S**abâllunna manabi orèng Madhurâ kabânnya'an ampon onèng dâ' ka jhâjhânan panèka, asabâb jhâjhânan panèka ampon kalontha. Polana bânnya'magharsarè sè ajhuwâl è pasar *Tradisional*, è abâ'saggi dâri nyamana jhâjhânan panèka lèbur kedinganna ka panèngèl, nyamana èngghi panèka **KUWÈ LEMPOK**. Manabi maghârsarè Madhurâ sè abit kalowar alako ka kottha, pas mireng lughâlluna nyamana kuwèna panèka mastè è dâlem pèkkéranna èsengghu lèm otabâ lècang yakni parkara sè biyasa è ghâbây panyekka'an buku tor laènna. Padahal panèka nyamana kuwè sè manabi ngangoðâdhân rangrang onèng nyamana.

Samangkèn kaulâ bhâdhi abherri'anna onèng dâ' para maos majala panèka manabi terro abhâdhiya kèya tor pola poron jughânan è juwâlla ka sar-pasar. Coma sè palèng penteng sopajâ tolèsan panèka dhâddhi parantara dâ' para maos sadhâjana otamaèpon para ngangoðâdhân ka'angghuy ta' maèlang kuwèan dhimèn maklè pagghun bâdâ salanjhângnga. Kuwè Lempok

panèka bhidhâ sareng lemper, tatabun, jhubhâdhâ otabâ laènna, sabab bâdânâ ghella' è ghâbây dâri camporan pan-saponapan parkara. Anapon bahan otama èpon sè kodhu è siyap'aghi ènggi panèka; Jumbeng panèka bahan otamana, ghulâ pasèr otabâ ghulâ tarèbung (ghulâ mèra) ngèrèng kasokan, bujâ, nyèor, mènnya' nyèor, aèng, saè jughânan manabi è berri'ann pandân ka'angghuy ghâbây maro'om,

Anapon cara aghâbây Jhâjhânan Lempok panèka pangabid jhumbeng sè ampon lastarè è bherse'è kalabân aèng sè soccè pas tarkas èpamasok ka dâlem sobluggâh è andhel sampè' ngolpa' aèengnga, dâgghi' manabi ampon jumbeng abâk massa' pas terros è bâta' sabâ' ka lesson otabâ pakakas sè kènnèng toto laènna. Salastarèna panèka jumbeng sè ampon massa' tor èpamaso' ka dâlem lessong toto jhâ' kaloppaè camporan ghulâ paðâ bhâi ghulâ mèra otabâ ghulâ pasèr jhughânan bujâ polè, toto jhâ' cor-ancor ghellu. Manabi ampon lastarè jumbeng ghella' kala' kalabân cènthong otabâ sèndo' koro' pabhârsè pas salastarèna è sabâ' ka talam cel-peccel pabentu' pabhâghus coma biyasana dhing èkerra' abhentu' sè kapra è palanjhâng masèghi empa', tor jhâ' kaloppaè è dâlem talam ghella' parèngè mènnya' nyèor sopajâ baðâana jumbang sè marè è toto ta' nyaker ka tanang otabâ ka talam. Lee mon la lastarè è bentu'masèghi empa' jhâng-lanhâng tèros ngala' todi' pangerra' ghi'-sèghi'. Panotop dâgghi' manabi sampèyan terro ajhuwella ka sar-pasar ènga' jhâ' kaloppaè bâddhâin ñaunna gheddâhâng pas è attas sah biyasana è parèngè parotta nyèor sè alos, èngghi manabi terro è tambhâ'anna ghulâ mèra sajân saè ngèrèng kasokanna sèra onèng sajân makapencot orèng sè terro mèllèya.

\*Alumni Pondhuk Mambaul Ulum Bata-Bata Mekkasan

# Luhad

(Terrosanna cerbung majalah Jokotole edisi 28)

Angghidhân : Zainudin\*



Sanajjhan Luhad  
ètondhung moso Kyaèna,  
Alhamdulillah ghik  
pojhur tarbhuka. Luhad  
daddhi orèng sè teppa'. Ka  
rèng towa duwa'na  
abhaktè ongghu ban akor  
bi' gha-tatangghana.  
Sabab nyalèndhana  
Luhad ghik bakto  
mondhug banni karana  
èsangaja lakar la hèlap  
ongghu. Nondhungnga  
Kè Lo Tompo nyatana jat  
lakar Kè Lo Tompo  
ngaghali ja' Luhad la

mampo ka'angghuy molè ban èyangghep la bisa nerrossaghi madapa' èlmo ka masarakaddha ban apa-apa sè èkaollè sa'abidda mondhus è dhalemma. Masalah calatthong ban pola tèngka laènna sè macaremmedad ongghuna Kè Lo Tompo la nyapora.

Baja ri'-bhari'.

Ollè du minggu Luhad bada è bengkona. Marè abirid ban ngajhi saellana abhajang mangrib, Luhad toju' dang-ngindang è battonna kobhung sambi ngakan kellana bhengngok karèna ghik sèyang sè èkella mon Mbu'na. È kampongnga Luhad jarèya jat biyasalah ka rèng towana dhibi' nyambhat Mama' ban Mbu', ghik tada' sè ngolok Rama-Ebhu, Eppa'-Emma', otaba Abi-Ummi. Bada kèya sè nyambhat Kaji ka rèng seppo lakè'na polana jat laker katoronan ajghi. Salaèn jarèya kabaddha'an è kampongnga Luhad ghi' sanget awam parana. Polana masarakaddha Islam kabbhi, keng tada' sè abhajang sabab tada' sè daddi Imam. Tong-sèttongnga orèng sè abhajang ban ngajhi pèra' Luhad, polana tao nyantré ka Kè Lo Tompo. Mon sè laèn ada' sakalè tamaso' Mama' ban embu'na. Masè bannya' rèng andi' kobhung tapè masjid tada' sakalè. Mangkana Luhad dhing abhajanga ngangghuy totora'an dari alam kadhiya sè è jellassaghi neng kètab-kètab salaf. Mirisse polè, kabannya'an kobhung-kobhung andi'na tatangghana għun èkagħabay baddhanna bhungħana jagħhung kerrèng dhing masa arè'an jagħung.

Sampè' urusan rèng matè ta' èpandi'i ta' èsoccè'e ban ta' èbhajangngagħi langsung cokop èbhendem ban kalamħi kaddhu' ghuy-angħuyanna rē-sa'arèna, ta' ngangħħuy labun. Tada' tahlilan tello arè, pettong arè, pa' polo,

nyataon, ban tada' nyaebuna. Najjan ta' atahlil nja' banni kampongħa Wahabi, keng polana dari bhudħuna sakampong. Poko'na mon bada rèng matè pas bhendem èyanggħep marè pas. Ban polè bagiyan binè'an sè lalabat għun teppa' è patada'na. Marè jarèa ada' kèya pas.

Kabada'an sakitar malem jarèa mengremmeng, bulanna għi' ta' ngombar. Jħutao ja' tangħħal barampa bhalakkadan. Bintang-bintang nèp-ṅgaren nèp è langnġe'. Damar congħiet ngancae Luhad sè aghu'-ghangħħu' kellana bhengngok è kobhung. Mama' ban embu'na pade nyerrot, keng sè Mama'na nyerrot nanas è lolompongħa pas embu'na nyerrot poco' è palèmperra. Seddheng tatangħħana serep da' kasa'na. Ma'lum, mon malem laker jat biyasa nga' jarèya. Apapolè ta' patè bannya' bengko għun lèma soma sèla bariya ta' along-polong. È jarajana duwa'an ella' tello tegħħal. Jħubara' duwa'an kèya, pas bara' lao'anna sa soma ella' tabun. Seddheng da' lao' ra-kèra tello kelu bada pasar, keng mokka'na sakejja' sabban salasa satengħha bulan sakalèan. Pas da' morlao' ban da' témor alas. tada' bengko.

Luhad pagħħun aghu'-ghangħħu' kellana bhengħogħha, kellana bhengngok malolo ta' esellae semen ban tap-tapenna oli, aih... tabu'na orèng pas soro eccor 〔〕 〔〕 Siah.. Jha' jarèya besty-na mèsem-mèsem reħħ, antos patennang pokon' mon carèta rēa għitak marè ja' ghulijan baca pa sampè' tammat. Dhing tammat bhuru sokana laj ja' da' emma'a. Ngarè'a ħajnej, għu-togħuwa ka sabana mon sè padina la terbi' ngħerèng kasokan.

Malem la sajan arangka'. Kellana bhengngok ghik bada karèna, ta' è paabi' kabbhi

moso Luhad. Mbu'na la taker ambu nyerrot poco', karè Mama'na ghi' pagghun nyerrot nanas è lolompongnga. Luhad toron ngala' aèng ka daporra. Amor-kemmor pas terros abhajang èsy'a'. Wudu'na 'kan ghitak bhattal. Sampè' marè abirid sè abhajang èsy'a', Mama'na Luhad pagghun ta' ambu. Kadhang sampè' tengnga malem bhuru ambu, keng ambuna ta' langsung asarèn. Ghi' mesel bhako ka kole'na jaghung pas èkello'è èkaroko'. Mama'na Luhad orèngnga lakar tangngè. Kadhang samalem bhentèng ta' asarèn sakalè.

Luhad toron dari kobhung nolongè Mama'na ngangko' bang-buwanganna nanassa ètomo' ka pamengkangnga pas éyobbhar. Mon ca'na bahasa Indonesia-na nanas roa 'kan sè è kenning kakan ya? Sè énga' rèya ya ➡ tapè mon è Madura jarèya è koca' lanas. Mon e bagiyan dinna' rah, ta' tao mon è jadiya. Pas sè è koca' nanas è dinna' arowa sè tombuna énga' pandan keng konco'na meccèt aduri lanjang. Daunna akandhellan moso pandan, keng ta' ro'om énga' pandan. Dagghik dhing ella marè è serrot pas èpakerrèng ban è jhuwal ka pasar, ya kadang ta' usa ghiba dhibi' mon teppa' boda tokang tanggha'na sè alèng-lèng nyarè ka bengkona orèng tong-parsèttongnga sè nyerrot nanas. Mon ca'na bagiyan pajurung otabe orèng sè majang è tase' palèng koat talèna jangkar ban tampar pamanggherranna parao ting la neppè otaba tandhuk ka labbuwan ya bahanna sè è kaghabay dari nanas.

Malem la sajan pèdi'. Luhad arassa cè katonduna. Damar conglèt è kobhungnga la matè, èabi' minnya' eggassa. Sè è palèmpèrra la milè' kèya, ta'rung la karè sakonè' kèya minnya'na.

"Bule tèdunga ka-ada', Ma' " ca'na Luhad "katondu pon".

"Iya kassa' lah" ca'na Mama'na Luhad. È daèrana Luhad jarèla biyasa na'-kana' ka rèng toana ta' abhasa èngghi-bhunten. Sè kappra engghi-enten, èpabaramma'a polè. Malah sajan bada sè mapas tekka' ka rèng towana dhibi'. Mon la toronan, Mama'-embu'na ka Nyaèna mapas enja'-iya, la torot mon kompoyya ro-nèro noro' pato mapas kèya.

Luhad entar polè ka kobhung, sabban malem tèdung è jadiya kadhibi'an. Mama'na terros nyerrot, matotog karèna sè satèngkes. Kopina èkasandhing, ja'-sakejja' èsèrot. Rokok la ta' ètemmo barampan kalèna sè mèsel. Mon ta' ngebbhul ta' tangngè, ca'na rèng kona jat asongko' akalambhi. Dhing bada rokok kodhu bada kopi.

\*\*\*\*\*

Mon sèyang kalakowanna Luhad ta' bhida jhau moso ghi' boda è ponduggha. Ghu-lagghu lem-malem ngarè' nolongè Embu'na. Keng sè èyobu rèng towana Luhad banni jharan, tapè sapè sapasang. Mama'na bhan arè nyèmbhal kaju. Kadhang Luhad nolongè kèya ngangko' kajuna sè èghabaya bhu-rebbhu neng è tomang. Sabagian kajuna èjhuwal ka pasar. Luhad ampona nolongè kèya mèkol dhing kajuna èjhuwala.

È sèttong arè Luhad èsoro ngampong aghilis jaghung ka bengkona Bu' Dimo jharajana. È dissa' andi' ghilisan, seddheng è bengkona Luhad dhibi' ada' ta' andi'. Nyamana bhai ghi' jaman laèp, pa-apa'a ghi' tada' sè ngangghuy dari mesin. Tada' sellip, mon terro atana'a nasè'

jaghung usa ghilis ghallu jaghungnga. Corèt bhai ghi' ada' sè bingsolan, kabbhi corèt parebbhuna dari Kapo otabe kapas. Mangkana bada ngoca' mon corèt sè tada' eggassa rowa ca'na pangeppok. Polana ting ngodi'ana'a ambhu plog-sepploghan barampa kalè sè odi'a.

Luhad mangkat ka jharajana, dhing dapa' log-ologhan è tanèyanna polana labangnga abukka' pas nèngan ta' nangalè kalèmba'na orèng.

"Dhika bada bhi' Dimo?"

"Uuuuy... Arèya' engko' bada è budi. Sapa ihh?" Mon gulungan nè-binè' iya jatta dhing bada ngolok panyaodda mon ta' uyy otabana iyyuuuutt èkowa. Kowana apa ellu? Kowana rojhak apa siomay. Mon lalaké' ta' nya'-bannya' bhanta. Mon é tanya'aghi dateng dimma, Man? Teng ngarè', Cong. Wis lah, ta' akebbi' polè.

"Bula bhi', Luhad. Èsoro ngampong aghilis da'ento"

"Ahh... ba'na ya, Had. Ya ghiba danna' lajhu. Arèya' pangghilisanna bada è palèmpèrra dapor"

"Ngghi, bhi'..."

Luhad ghassa'è matoron jaghungnga sè èsongkol è bhauna. Pangghilisanna ghi' usa paranta, cobbhu'na baddhana ollèna aghilis è saba' ka'ada' è attassa lama' sè la èyampar. Pas ghilis pangrajana sè aghir-lèghir attassa èpatoron èsaba' ka cobbhu'. Terros è attassa èberri'i korpèngnga jaghung sakonè' ghabay pancèngan ollè ta' lèya' bila mintella. Pas bhuru ghilis sè bada ghaghingga è patoju' di attassanna. Marè jarèya pas langsung ghaghingga ètopè, pas è selte' pas è kacar pas è cowe' ka panitè'. Siah, ma' èrèken

ècoco' duri, ya mon la siap pas totta' ghan saperghem jaghungnga ka ghilissa sambi ènter ghaghingga kor laonan. Mon épasant' polana bisa burung sé atana'a. Aih ja' cem-macem nabuy ongghu san-kassannaghi jaghungnga. Kèng mon tao rassana aghilis jaghung aslina lèbur kana'. Abbeehh ongghuwan, rèh!

Mon korang alos marè èghilis sakalèan kadang ètolèyaghi sampè' dukalè otaba tello kalè. Sè lèbur bila nolèyaghi dukalèyanna, bherras jaghungnga ètotta' è panojun è attassa ghilis. Kan ghilis sè bada ghaghingga jarèa tengnga'anna alobang, mon dhing èyènter ghilissa pas bherras jaghung sè è panojun rowa nyot-sot tengnga'anna akadhiya ghunong pasèr sè asalla madu'dung pas tèngrep rata laonan.

Ta' è karassa Luhad temmo marè sè aghilis. Pangghilisanna è saba' polè ka kennengnganna. Bherras jaghungnga èbaddhai polè ka apa ongghu ya? Ghella' kan loppaè ta' abala ja' èbaddhai apa ghun ngoca' èsongkol è bhauna. Mi' è baddhai lèpè' tabana jhambangan ngara? Mon ca'na ba'na sè teppa' èbaddhai apa mara?? Hiaaahh, lopoot...!! Banni, ongghuwan lopot, asli salah jawabhanna jaré. Iya, mon kapprana è jadiya nga' jarèa jat. È dinna' laèn reeh, jaghung è baddhai kotèmangnga sabbhu'.. Behh, ja' aghella'? Ma' bisa, mata' bisa'a ja' rèngan Luhad sè nyoro. Molaè bile ra kotèmangnga sabbhu' kennèng kabaddha bherras jaghung? Akkalè mon terro bisa'a, kattèlè motor pikep apa? Ya Allah, Luhad amit molèa bhi'... Yuumuuuutt èkowa. Noro' jalan Luhad sambi kèr-mèkkèr, bha' ta' ngoso'a sè maca, rèh. Mon carètana kassannaghi ta' è temmo konco'-bhungkèlla. Mon bada sè ngoca' gileh berarti sè maca aghile'en polè. Ja' rèngan la tao

dari ada' sajan salbut, ghi' ebaca? Lah sokana, kan sè è kaparlo lucuna, ya mon bada hikmahnya èyatorè kala' deiyyeh roo.. gus-bagussa kala', sè jhubè' buwang. Al-udi'-u fa la yuaret ca'na. Mon é artè'è baramma pas? Odi' ja' kala' rowwet. Sè penting jalanna lakoni, lakona jalani. Ais, tabhalik ya, oba dhibi'. Ta' ghellem, torot!!

\*\*\*\*\*

È kampong bara' dajana Luhad.

Bada rèng soghi nyamana Ma'na Moningram, andi' ana' bine'-paraben-cè' raddhinna, nyamana Pariyu. Kèng sayangnga, polana soghi Ma'na Moningram jarèya sombung. Tatangghana sè laèp lajhu èsokerrè kabbhi. Sabadana orèng minta sadaka ta' èbherri'. Ma' taker sadaka'an, jha' mon bada rèng aotanga jaghung, pèssè ban èn-laènna kodhu nètèp ajamma ghallu. Pas polè la ta' kabitong pan-barampan orèng sè alamara ana'na kabbhi ètol'a, ada' sè è tarèma. Padahal rèng sè alamar jarèa enja' bannè jarèa pas rèng laèp kabbhi. Bada kèya sè soghi sè ètol'a marghana rèng towana salèrana jhuba'. Lancèngnga la gantheng, soghi, jaraghanna parao è tase' tèmor. Ètol'a kèya. "Najjhan soghi, duh pèndha engko' abhisanan ban rèng pèrot bariya" pèsona Ma'na Moningram.

Serrèna lako nola'an lancèng, pas bada rèng daja ghunong sè nyamar daddi musafir. Namoy ka bengkona Ma'na Moningram jarèya, tapè niyaddha la'-nyala'a. Mangkat baja ra'-para' sorop arè. Agamisan, surbanna èlè'-lè' è paraja ban ta' kèlap jhendarr!! Arrahh leddhu' lah... Maksodda ta' kalèp atongkedan ollè so' gaga'.

"Pangapora?" Ca'na tamoyya dari tèmor lao' taniyanna.

"Èngghi, nika' longghu ka'enja" Saodda Ma'na Moningram bhuru kaloar è labangnga. Tamoyya èyajhag toju' k lèncaggha è palèmpèrra.

"Cangkolang pamator, kaula dari parjhalanan jhau manabi èyèdhi'i terro amalemma è ka'dinto" polana dhing èyabas tamoyya ghi' anom, aoba ta' abhasa alos polè aoba pas ghi-enggihyan.

"Oo... nginebbha dinto maksodda ghi, sapa nyamana dhika ban dari dimma?"

"Nyama dan kaula sèngko' malèng tobadan ..."

"Astaghfirullah...!!" Ma'na Moningram mengnga' takerjat. "ma' anyama sèngko' malèng, pola dhika lako ngèco' napè?"

"Bhunten, nika nyama paparèng dari rèng seppo kaula. Tor ca'èpon rèng seppo kaula manabi bada rèng ngologha nyama dhan kaula kodhu paghenna'. Ta' olle sèng, ta' ollè ko', ta' ollè malèng. Kodhu langsung olok sèngko' malèng" ca'na tamoyya.

"Oh... ngghi.. ngghi, dhika rèng dimma asalla? Rèng mon èkatèla' dari angghuyya kaja'a dari Arab katon"

"Bhunten banni dari Arab. Dan kaule amusafir asallèpon dari Hindustan, ampon korang langkong tello taon bada neng nagari Meduro sa'meniku"

"Baddiyanna.. Mangkana pas bisa aoca' jhaba kèa ghi?"

"Ghinèka sal ngocol, korang parèksa teppa' napa bhunten"

Ta' abit Pariyu, ana' bine'na Ma'na Moningram kalowar ngangka'è kopi. Tamoyya alèrèk maba terro abuktèyaghiya cara sapa raddhinna. Kapan la sakalèrabhan nèngalè ka robana, atèna akarettek-kettek, akarettek. Pèkkèranna adindang malayu ca'na sè rèng seppo lambe'. "ya Allah.. mon arèa aslina ngolèsnings bikin furdu'dadaku" bhatènna.

Pariyu maso' polè ka romana, terros èntar ka daporra arakora pèrèng. Oh iya ongghu, loppaè ta' ekabala, ano.. apalah ongghu, Mbu'na Pariyu jarèa matè la abit. Daddi è bengko jarèa Ma'na Moningram ghun enneng kaduwa'an ban Pariyu.

Sè kaduwa pagghun nyator, sabharang molaè dari urusan wan-owanen, perghi ban samacemma. Ma'na Moningram acora' senneng kèya ka tamoyya. Karetteggha "Massè sakeddhagan lèbur kèya tamoy rèh, cocok ja' sakèng daddi tang mantoh"

Sanajjan antara tamoy ban towan romana pada saroju' dalem sajha, kèng kaduwana pada todus ta' makalowar okara semmon sè nyeddhing da' teghessa-tojjhuwan. Ghun salèng meddhallaghi pangalamon è lottrèngan ngenangenna bang-sèbang. Tapè ja' la ghun-ghunna andi' néyat kalèro, tamoy sè ngako anyama Sèngko' Malèng jaré nyarè cara kaangghuy sajhhana katekka.

Kasempadan, Ma'na Moningram amit ngarèmowa. Andi' naè'an tarebung tello po'on. Pas ana'na sè anyama Pariyu kaloar asapowan è taniyanna. Tamoyya tha-kantha ngabas

bhungkana pao sè la abuwa dhan-maddhan è dilao'taniyanna.

"Aniko paona ampona è jhuwal ghi, Le'. Bila pon bada massa'na?" Tanyana tamoyya ka Pariyu sambi mandeng robana sè raddhin.

"Èngghi, kadhang ta' ngantos massa' pokò' maddhan nga' ghineka pon èjhual, Kak" Jawabbha Pariyu nondu' mo-semmo todus.

"Oh ngghi, dhika potra binè'na pa' Moningram ghi? Kabarampa satarètan?"

"Kaula namong kasorang ta' ghaduwan tarètan"

"Sapa nyamana dhika, Le'?"

"Pariyu, Ka'. Empèan sèra asmana?"

"Bule Rengngè'..."

"Hihi... napana Rengngè'?"

"Bee... ngghi serius nyama bule jat Rengngè'.

"Wahaha... Ma' anyama Rengngè'?" Pariyu aghella' ngakak polana nyamana tamoyya lucu. Kaduwana molaè sajan akrab.


"Ghi, Jhu taowa... ja' pon paparèng dari rèng seppo bula"

(Bersambung polè... Insya Allah carèta terrosanna pas lebbi lucu polè, antos...)

\* Zainudin guru SMA Darul Ulum Batang Batang, alumni PP Mathali'ul Anwar Pangarangan Sumenep

# ODI' BÂN TA-CARÈTANA, SATÈNGKES SANJA'

Dina F Muja



Ta' bânnya' pangangghit Madhurâ sè bângal makalowar buku kompolan *sanja'* bhâsa Madhurâ. Salaèn pajhât malarat ka'angghuy nyoson otabâ ngangghit tor nèngkes puisi otabâ *sanja'* bhâsa Madhurâ, jhughân mèkkèr pasèra sè kasokan maos buku kompolan *sanja'*.

Laèn sareng carèta pandâ' sè lebbi èkasokanè sabâb lebbhi èkangartè. Puisi tor *sanja'* ta' paðâ sareng carèta pandâ'.

È antarana sè sakonè' tokang ngangghit *sanja'*, baðâ asmana Ajaz Elmazry. Buku kompolan *sanja'* Ajaz katerbi'an taon 2022 sè tapongkor kalaban bhul-ombhul ODI' BÂN TA-CARÈTANA. Kompolan *sanja'* otabâ puisi sè bâðâ è dâlem buku ka'ñinto amacem èssèna. Bânnè namong ñâri bânnya'na bhul-ombhul sè bânnya' langkong sangang polowan (90-an) *sanja'* sè bâðâ è dâlem buku ka'ñinto, namong jhughân pan-saponapan bârna tor èssè, amacem

ma'na tor tojjuwân maksoddhâ.

Dâri sacem-macemma èssè, è antarana bhâb tanè. Ajaz sè èbhâbbhârrâghi tor ajhâlannaghi odi'è dhisa, tantona kenthel sareng kaoði'anna tanè. Orèng namen cabbhi, namen padi, dhâddhi sombher pèkkèran ka'angghuy ngangghit *sanja'*.

È dâlem *sanja'* sè a-ombhul-ombhul *Namen Cabbhi*, Ajaz nyerrat:

Mon bâðâ reng lao'songay ka ñiyâ  
Kabâlâ, embu'taðâ' è ñiyâ  
Ngangselanna cabbhi ka sabâ  
Bannya'sè matè, du la ta'bâbâ  
Lagghu'la karjâ  
Jiya'la ngantang sè akarkarra ka sè rajâ

È dhisa, bilâ ampon ñâpa' mosèm karjâ, orèng-orèng tanè asajân posang manabi tanèna pas ta' ontong. Ompama namen cabbhi bânnya' matè, bârâmma sè èntara nyombhâng ka bengkona orèng sè akarjâ?

È laèn sanja' Ajaz nyerrat sèttong sanja' carètana orèng abhânta sajjhâna dhibi'. Ngacapak bhul-ombhullâ.

**NGACAPAK**

*Abhânta ngala'sakarebbhâ  
Apokpaktadâ'bâtessa  
Apacapata'dhuli kamareyan  
Sè ngèdingngaghi dhâlâaghâringghingan  
Ngara, sabâb Ajaz sè ngangghit kompolan sanja' ka'dinto lagghi' ennom, ghi' ngodâ. Bânnya'sè èyabâs, bânnya'sè èpèkkèrè. Amarghâ bânnya'ongghu sè èrekam pèkkèranna tor ètolès dhâddhi sanja'.*

Manabi sanja'-sanja' ka'dinto èmaos sadhâjâna, dhâddhi sè maos ngaghungè pamèkkèran sè lèbâr. Jhâ'ođi' ghâpanèka bânnya' èssèna, bânnya' bârnana. Otamana ođi' è dhisa, wabil khusus ođi' è Songennep (Sumenep). Bânnya' tengka ghuli sè kodhu èjâgâ, bânnya' adhât tradisi tor kabiyasa'an sè kodhu èrabat, bânnya' tabiat otaba sèpat sè kodhu èpateppa' sopajâ lebbhi saë è èdâlem agaul sareng orèng laèn.

Buku kompolan sanja' kaindo terbi' e penerbit Sulur Pustaka se bada e Yogyakarta. Tebel buku ka'dinto 176 kaca. Bâdâ asma Dr. Moh. Hafid Effebdy, M.Pd. sè nyunting otaba ngèdit (masèpa') èssèna buku ka'dinto. Sè kasebbhut katowa Yayasan Pakem Maddhu. Jhughân pan-saponapan orèng sè aparèng dhâbu pojiyân otabâna pangantar dhâbu ka'angghuy buku ka'dinto.

Ajaz Elmazry ka'dinto tamaso' angghuta sè aktif è Komunitas Ghâi' Bintang tor pan-saponapan kompolan organisasina orèng ngodâ akadhiya Ansor otaba komunitas literasi sè bâdâ è Songennep.

Buku ka'dinto namong sala sèttong dâri angghidhân Ajaz. Salaènna buku ka'dinto, Ajaz jhughân ampon materbi' buku laèn asareng

pangangghit laènna, akadhiyâ buku Kaki Api (2018), E & Joy (2021), Kasih Menata Luka (2021), Bersyukur dalam Rasa (2022).

Bâdâ sèttong kalebbhiyân è dâlem buku ka'dinto èngghi ghâpanèka Ajaz nyerrat sakasokana pekkèran. Ta' rèpot kalabân sèttong tojjhuwân otaba maksot. Sadhâjâna ètolès. Sadhâjâna èpèkkèrèn.


Ka'angghuy sakadhâr nyebbhut sabhâghiyân bhul-ombhul dâri kompolan sanja' ka'dinto; Ra'-Para' Èlong, Maso' Bulân Sora, Akabin, Kaè, Cong, Tang Cèwè' Ca'na, Ajunan Ghuru Abdhina, Kadhibi'an, Manyèttong Atè, Jhâ' Pataporop, Nyaksè'e Ghulina Ab'a', Ođi' Jhuntrong, Acarèta, La Cokop, La Tađâ' Pađâ Polè, Sakè', Ta'Pantes, Bannè Jhuđhu, tor laènna.

Kalebbhiyân laènna dâri serradhâna Ajaz mènangka panyair bhâsa Madhurâ, ka'dinto tađâ' bâtessa Ajaz è dâlem nyoson angghidhân. Poko' sadhâjâna bisa dhâddhi sanja', sadhâjâna bisa ètolès.

Sè cè' paddângnga dâri èssena buku kompolan sanja' ka'dinto, Ajaz pajhât ngotama'aghi pan-ponapan sè èkalèbât otabâ âjhâlânè dhibi' rè-sa'arè. Sè kasebbhut kearifan lokal jhughân ètolès sareng Ajaz. Tađâ' sangghâroghi otabâ sè ngalangè ka'angghuy nantowaghi èssena sanja'. Lajhu ètolès sasaèna. Kađinto tamaso' kalebbhiyân sè kodhu èyaghungè pangangghit. Sabâb manabi ètes-bâtessè è dâlem nyerrat sèttong angghidhân, tantona ta'saë ka'angghuy pangangghit.

Samoghâ'â buku ka'dinto dhuli andi' alè'. Artèna, pangarep ka'angghuy Ajaz Elmazry sopajâ terros nyerrat tolèsan ponapa'a bisaos. Salagghi' aparèng manfaat tor nambâ bânnya'na angghidhâna pangangghit Madhurâ è dalem arabât bhâsa Madhurâ, ka'dinto pagghun saë.

Kardhuluk, Oktober 2023



sulur

antologi sanja'

# odi bân ta-carètana

Ajaz Elmazry

Sajak-sajak Ajaz Elmazry sarat dengan nilai kearifan lokal Madura. Cara tuturnya yang bersahaja dan mengalir, akan membawa kita menyisir setapak demi setapak nilai yang terbentang di dalam "batin" Madura.

Ahmad Kekal Hamdani, Ketua Lesbumi Pamekasan

